


墓誌銘

西堂集
八



西堂先生集墓誌銘卷之一目錄

亡室

贈貞夫
人海州

崔氏墓誌銘

從叔父學生公墓誌

成均進士金公墓誌銘

再從兄施老氏墓誌銘

淑人洪氏墓誌銘

再從弟士溪墓誌銘

亡弟大仲墓誌銘

再從姪寅培墓誌銘

司徒僉正趙公墓誌銘

芝浦朴公墓誌銘

通德郎沈公墓誌銘

咸陽郡守金公墓誌銘

堂姪元培墓誌銘

淑人崔氏墓誌銘

黃海監司鄭公墓誌銘

習坎姜公墓誌銘

亡女沈氏婦壙誌

贈

左贊成行知中
樞府事李公墓

誌銘

貞夫人黃氏墓誌銘

任童子壙誌

貞夫人洪氏墓誌銘

權淑人墓誌銘

慶恩府院君金公墓誌銘

贈淑夫人李氏墓誌銘

尹淑人墓誌銘

恭人金氏墓誌銘

尹文伯墓誌銘

贈_貞敬夫人洪氏墓誌銘

先妣墓誌

領議政徐公墓誌銘

附外王母遺事

叔父知事公墓誌

沈淑人墓誌銘

從叔母柳孺人墓誌

西堂先生集墓誌銘卷之一

公室贈貞夫人海州崔氏墓誌銘

孺人名某姓崔氏崔爲海州望族在高麗有文憲公
冲文靖公滋其事迹在史冊入我朝有諱慶昌以文
行著世世稱其歸爲孤竹寔孺人五世祖祖諱某司
導寺正考諱某敬陵叅奉負士友望早幼妣順興安
氏贈戶曹叅判壽星之女而文成公裕之後也貞懿
有士女行孺人以甲寅四月七日舉於文化官舍英
慧夙成爲祖父母所賢愛癸亥隨祖父官淮陽遭叅
奉公喪踰年而安孺人繼沒俱執喪哀戚如成人年

十五歸于余明年己巳家君以校理被謫于海島孺人入李氏門未幾執匕鑰幹家事上奉祭祀下撫僕御皆井井有條理癸酉孺人有身八月而病婉而子死因悲悼傷歎病以轉劇至其年十月八日竟不起得年二十嗚呼痛哉用死之十一月葬于楊根古同山先壠下已坐之原孺人少而敏悟長而端潔克以禮自持不妄言笑每內外親黨有宴會他婦人歡笑爲樂而孺人獨默然終日性又剛正見余有過必以義規警余或加以恚怒不少撓但曰吾而不言誰當言君又奚取於吾哉余見世之婦人咸以呶嘽取悅

爲事見君子所爲有不合於理者一再言而不改則
不從而順成其非者幾希此則孺人之所深恥也孺
人平日顧知愛文字雖古大作讀不數遍能暗誦不
忘余讀書至疑難處或以問孺人孺人爲辨析皆當
於理至左氏雍姬事孺人曰聞而不言父死言夫死
無寧已死而父與夫生也余曰何居孺人曰遣二人
一告于父以其父之謀一告于夫以其已告于父遂
自殺也其能辨人難辨而理達識敏多類此至其病
中猶聞余碁聲歎曰吾雖不識文聞君讀書聲輒心
喜今矣此之爲耶嗚呼吾豈復聞是言哉孺人之兄

崔而順之言曰妹本稟操雅潔一毫取與無苟於心
此則受誨於先妣者然也作於心然後發於口絕無
作爲之態者類乎先君子好靜而惡鬧不事呶呶爭
卞者酷似我此吾妹平生爲人而惟其沉靜不顯故
雖族屬鄰竝之間鮮有知其德者孺人之族之知孺
人者謂其言之然也始叅奉公之喪安孺人毀而欲
自裁時孺人年甫十歲審其意未嘗離側一日安孺
人若有持物置枕底者孺人探得小刃潛匿之至夜
深安孺人果反枕而失所藏孺人益憂畏屢夜不就
寢安孺人病且革乃撫孺人而泣曰若年幼吾不見

若之長成也。雖然，吾舅姑愛若甚，吾亡遺念於若矣。安孺人既卒，孺人哭踊，孺慕不自勝。長者憐其弱，而能毀也。時勸以味之滋者，孺人號泣不肯食。長者亦不忍強焉。蓋其篤孝天性然也。然病亦崇此云。方其病之甚也，潛語傷人曰：「吾天地間窮人也，早失父母，至痛在心。將移吾孝於舅姑，而五年海外承顧無期，今又不能置一子以死死，將泯然於世間矣。」又孰有憐悲余者，因涕泣沾襟，目爲之腫，將絕，開眼視余，合已復開，遂瞑不復開。嗚呼！吾何答而天之忍而爲是也？嗚呼！哀夫！銘曰：

彌智麓古同足李氏德壽敢告來後是惟公室崔孺人之藏底幾其壙之勿傷也

成均進士金公墓誌銘

進士金公歿且二十年幽堂之誌闕焉於是公之諸孤托公門人金起淵等俾爲狀而謁銘於余余少遊西京習聞公事行又嘗識公之子義不可終辭謹受而序次曰公諱紀萬字永年自號愚翁系出清州九世祖益清仕麗末爲判軍器寺事其孫懷信光廟朝登第至平安評事其後連四世不振至公考時鉉始復擢本道別科由禮曹佐郎出監殷栗縣以終公少

慈良於物無所傷長更軒爽喜施與樂周人之惡尤
篤於孝行嘗在外得母夫人訃以親在遠遊自悔責
遇忌必前五日齋沐終夕淚交頤家人以新免於喪
適然耳其後每見如此至老猶不衰丙子虜難公年
十七舉家竄匿海島時大父母并遘癘而沒公乘夜
穿賊陣入城親負致棺具舟爲風所掣去岸已遠公
亂流幾殆遇纜罹其足得無事人謂孝感所致卒能
運兩喪塋先壠不以亂故而殺其禮又匍匐行間落
間求食歸以供兩親危困萬狀而不懈益勤人並以
爲難甲午登司馬試因廢舉業不赴惟自肆於山水

詩酒以自娛其詩天得爲多奇雋無凡俗氣每片語
脫口人爭傳誦於人親其善而矜其不足因其才分
善爲開導文武科甲多出其門其論事成敗人物臧
否後皆鑒鑒有中善於調諷捷出巧應其端無窮人
不能折也庚午七月感疾漸欲諸子操藥以著則曰
若輩幸無自勞吾年止於是矣召門人黃戴華曰汝
習於喪節自歛至葬汝宜尸惟儉勿奢乃吾之志春
秋七十一配交河盧氏副護軍夢良之女先公沒有
三男一女男振溟振瀛振泓女適李汝柱側室三男
振濂振淵振汝振溟之出爲昌運聞運秋運振瀛之

出爲丁運啓運泰運商運德運振泓之出爲亨運長
運景運齊運長運庚午司馬振濰振汝各有一子曰
致運一運餘幼內外曾玄多不能盡載每春秋良時
公肩小興遊覽遠近其導御前後非公子則公孫西
京人比之陳大丘至今艷稱公雖才不售於世亦可
謂得福之全者矣銘曰

位在於人壽則繫天惟與人畸斯有天年矧公有子
有子有孫有携有嬰偃伏呌喧公孝其親天以是錫
彼朱紫者終歲危辱請論其福吾無爾羨銘以詔後
善者其勸

淑人洪氏墓誌銘

朴君質夫余與之遊久矣余於質夫事有可爲豈以
辭讓爲哉今質夫乃以其先淑人幽堂之誌見屬余
竊念金石之銘宜得世之能文有名位者託之所以
重其事也余顧非其人用是辭辭再三矣質夫曰以
子之親我也不求之他人而惟子之求子而若此吾
無望矣余旣不得已許焉則輒從質夫徵淑人言行
之一二質夫曰吾母以丁酉生生十八年而歸于我
大人凡十九年而以壬申十一月十六日棄諸孤吾
時尚少於平日所爲不能詳察而謹記斯吾不孝之

罪也雖然嘗聞吾母在家而爲女顙悟端秀甫七八
歲已能持身有法王考議政公大奇愛喜稱說及議
政公捐館哭泣悲哀以至成疾其旣嫁而爲婦承意
婉順甚得舅姑之歡心前後居喪手治饋奠祭則涕
淚漬席觀者感歎其檢身而理家善惡必審取舍言
色未嘗急率賓客飲食之供務精以旨被服器皿之
屬必潔以完以至垣牆室廬之事治之靡不井井有
法我大人能不以家事爲累繫吾母是賴此吾母事
行之大畧而吾所耳目焉者也子是之書足矣言已
泣又曰吾母之賢吾自言之人之信之宜不若他人

之言也嘗聞吾季姑爲沈氏婦者每向人嘖嘖曰吾
閱世之婦人多矣惡良敦睦未見有如吾兄者從祖
原城公嘗語家人曰吾宗家設祭之日內外寂然若
無所事及見饗具無不豐潔吾宗可謂有賢婦矣凡
此皆吾家內外之公言而非有私者也言已又泣又
曰吾母南陽之洪當宣廟朝策光國勲判戶部事諱
聖民是爲五世祖在仁祖朝以平安道觀察使殉節
于金化之戰者爲曾祖諱命者在孝廟朝爲右議政
者爲祖諱重普金氏籍慶州官副提學者爲外祖諱
慶餘女吾母者曰江原道觀察使諱得馬婦吾母者

曰郡守諱鎮是爲判書義堂公諱長遠之長胤吾大
人今官于沃川吾第二人曰龍秀芝秀吾妹二人采
好孫俞啓基其婿也吾母初葬驪州甲申移葬于洪
州法公山下坐戌之原願子備載無遺言已又泣余
惟淑人在家而孝父母旣嫁則順于舅姑奉先而殫
其誠治家而盡其法以至飭躬接物無一不可書者
可謂賢矣獨其年不稱德不及與享沃川公之榮而
且見質夫兄弟之能有立斯其可悲也余感質夫之
孝遂序次其言而系之銘焉沃川公名聖漢質夫名
光秀登辛卯上庠銘曰

女孝婦順終始一德蘋藻孔嘉珩珮甚飭修于一身
媚茲九族婉婉令儀如玉無鼓宜壽宜祉乃禰乃絕
蓄而不享于後必發質夫弓文我銘茲后以慰孝思
亦垂闡則

公第大仲墓誌銘

今上之乙未三月二日成均進士李君大仲得疾死
於城南之養生坊年二十七嗚呼吾之弟也哭而叙
之曰君名德海全義人高麗太師棹之後也先府君
諱某京畿觀察使兼兩都留守王考諱某黃海道觀
察使贈吏曹叅判曾祖諱某同知中樞府事贈吏曹

判書兩館大提學母貞夫人沈氏考諱某贈承政院
左承旨君以己巳十一月己酉生于南海君山先府
君謫所少而妍好漆髮雪肥壯則脩眉長身風標秀
邁挺然如出壑之松離羣之鶴天性孝友慈良淡於
物欲家庭之間未嘗有面赤之怒聲厲之言而至其
處身持論則踈通而慷慨正直而不苟非若世之所
謂仁善者多病於柔弱而已也又能踈財赴義坦懷
處物敏悟而不銜於小慧練達而不流於污俗是皆
生質之美而不煩於矯揉勉強吾求人於世而卒未
見君之比也君十一而孤以余爲師其讀書不甚多

天才不甚高而為詩文典實圓熟善發題意癸巳司
馬發解一等而覆試又擢壯元君既氣質粹美而有
文詞其年雖少能為士友所傾慕自宗黨交遊無不
喜稱君之美而世之人無論知與不知皆期以朝夕
顯敬君亦頗以功名自喜慨然有澄清一世之意嗚
呼其兄罪大惡極不早滅死於己卯之禍故天又降
罰不予其身而于其所愛君竟以強壯之年夭死志
業不及究於世事行無所見於後哀哉將死之朝余
猶不之覺君忽恣屏婦人呼侍者抱持我我其逝矣
顧見大夫人旁語婢子速持吾母去遂整衿而卧

余亟操藥而入不肯服曰服此何爲兄勿爲無益之
勸俄聞痰升聲君已瞑矣余亟呼曰有所欲言乎君
再開眼注視而淚痕泫然而已余復亟呼曰神思何
如君惟曰氣已盡矣心中則了了明矣其聲至可辨
而已遂絕絕二日乃襲肥膚鮮潔無損面奕奕如生
也以其年四月丁卯葬于王考察公墓左丑坐之
原始定齋朴公泰輔諫死於已已而無子有一女以
歸君君竟無子而有一女將待兄弟之有子者而爲
之子善人不必得善報豈獨君也哉悲夫悲夫銘曰
我死君埋理之宜君死我埋埋我誰血染我筆銘此

詞茫茫來世觀者悲

司導僉正趙公墓誌銘

自世教之衰也孝敬餒如網之不補利慾勝如川之
無防於是諛語德色或施其親刻民肥已寢以成俗
悲夫俗其不可醫乎教其不可施乎惟故僉正趙公
則蓋嘗誦而不疑以爲若公之爲宐有良史書之以
風厲今與後今公位不稱其德年又蚤踰中身而沒
爲善之報其安在乎悲夫公諱泰壽字士維至性根
於弱年其出外或遇佳味輒持歸獻親母李夫人嬰
疾積歲沈痼公殫誠扶護終始無惰容見者以爲難

父議政公春秋高善病公憂念甚事之稍涉害疾者必奔走諫止雖聲色拒之反復啓喻得而後已凡衣厚薄食損益亦必斟酌以進每食下親檢所進多少夕較朝今日比昨日同喜減憂加則又慮其虛一家相傳某之事親好惡皆憂云至其疾痼而年衰而非委頓常在親側周旋給使甚捷常曰吾性鈍又善忘然若係爲親輒心開體輕其有故異居必日三四遣人問寢啖起居至屬纊前半日猶然移事母之誠以事舅及從母舅素號性嚴於公獨無所憾此公之孝敬著見於家庭者也年四十四始筮仕初除內侍教

官例陞掌樂主簿遷禁府都事儀賓都事水運判官
站人服其清稱爲百餘年來所未見以媼適拜宗廟
令移司導主簿社稷令出爲交河縣監廩以約已明
以莅政值荒歲免民應納錢二萬以他經紀移充捐
常廩濟民之窮以親病棄歸交民懷惠碑之叙拜敦
寧判官陞司導僉正俄移安城郡守未赴適凡公所
居官皆以廉白見稱尤嚴辭受苟非義雖親故面遺
一皆却之於請託尤不拘顏情亦未嘗自引義理以
取潔名故射利好勢之徒無所爲而日跼議政公出
入要津車騎滿門公所居乃有閤然無履跡之時公

之喪孫文以哭者有曰朱門之內別有寒屋此公廩
約之著見於莅官與居家者也教子弟不昵而慈不
怒而嚴閒居告以古人事跡使浸潤慣習讀書必令
端坐徐究程課既足雖教蕩非至踰閒不禁大率於
太慢處嗇之於太慢處警之家人有過未嘗苛摘必
柔辭戒飭奴僕有依勢而橫者輒痛繩不貸故議政
公貴極人臣而奴僕乃以不免人凌藉爲患早嬰奇
疾屏絕嗜慾常淨掃一室瞑目靜坐室中所有衣食
筆硯之具莫不有位置所著文詞閒淡有法度間嘗
鬼捷發解而病益痼數益奇竟不成一第性喜書病

不能讀則循環熟看於經傳尤照筆傳家法道正妍
媚議政公嘗曰某才勝我此又見公細行之靡不謹
而小藝之必致精也公生於戊戌十月九日終於乙
未六月二十四日得年五十八遺令治喪以儉九月
從葬于忠州省洞先兆之側乾坐原議政公名相愚
考曰禮曹判書贈領議政謚忠貞公諱珩祖曰分承
政院承旨贈左贊成諱希輔李夫人之考曰尚州牧
使諱長英祖曰戶曹判書諱景稷此爲內外三世也
公娶青松沈氏全羅道觀察使權之女生二男長駿
命進士次龜命生員皆有文行嘗謂公天姿甚粹存

心克己之工深而變化氣質者爲多蓋其心以爲凡
行已處事寧約無夸寧拙無巧寧細無踈寧拘無苟
然而考諸其行而有違於中道者幾希特夸夫議之
以爲約巧家詆之以爲拙必過於踈者而後謂之細
失於拘者而後謂之拘耳高而不近於名卑而不溺
於俗推孝友之行而在官可法執介潔之操而應物
不滯歷觀古今賢人固有從事學問忝累銖積至於
道者矣若夫硬做工夫自然合道如公者則世或鮮
焉子夏所稱雖曰未學吾必謂之學者唯公庶幾當
之歟公之婦余之外姊也余故知公爲審銘曰

其事親也執玉而奉盈其莅官也蘄苦而冰清論公之行嗟誰與并生非不攝而膏肓之纏文非不工而時命之遭語公之窮噫將咎天銘以識其藏陵谷或變遷

通德郎沈公墓誌銘

公諱漢章字緯卿青松之沈皆祖青城伯德符家世烜赫甲於東方至諱諱官禮曹判書生諱東龜弘文館應教贈大司憲生諱攸弘文館副提學是爲公之大父父也妣貞夫人完山李氏掌隸院司議命說女伯父處士諱敞配曰平山申氏通德郎暹之女大憲

公愍處士公無嗣早世命公爲後申孺人取公孩抱
身自鞠養公亦自幼至壯承順無違人不覺其非孺
人出也稍長德器日就步趨惟諾咸中矧度大憲公
鍾愛異諸孫期以遠大旣冠治舉業屢捷司馬解或
兩中或居魁輒屈於會圍亦嘗屢登大科合考終未
入格駸駸晚暮特以李夫人高年在堂雖黽勉應舉
而蓋公已自辦其疇於命矣擬蔭仕前後至八九而
竟亦靳除晚而治第於西湖親戚吊慶外惟閉門却
掃不妄交遊左右圖史簾几脩然處躬約四十年徃
徃疏糲不給而安分順命未嘗有憂嗟之色庚子公

年十一持大憲公承重服遵禮如成人庚申丁祖妣
金夫人憂至壬戌服未闋而申孺人又下世積毀成
疾幾至滅性戊辰副學公捐館庚辰李夫人又違世
連服重喪舊疾轉至沉痾至甲午十月六日告終于
正寢距其生庚寅得年六十五以其年十二月權窆
於黔陽屹里項先兆坐艮之原公天性重厚寬仁其
事親一於孝敬周旋奉養無少違迨暇則與昆弟講
廟文史友愛甚篤教子女未嘗嚴訶峻責諄諄提誨
使自知勉御僕隸務存平恕雖有罪過不大聲色待
人接物樂易和信簡慢傲誕未嘗形於色辭以故親

戚鄉黨俱得其歡心副學公以宗孫家貧乏俾昆弟
輪行先祀公謂此非心所安專自擔辦自值忌辰前
期拮据雖至斥賣器玩不替品式將事之晨必先子
弟起盥濯正衣冠排布床卓至老不少懈早嬰喪病
不能肆力於文辭而濡染家庭門路得正唐宋諸大
家無不手寫成秩凡有無聊不平一發於詩格調清
婉聲律諧叶雖詞翰專門者未或過之如駢儷功令
之文亦皆典雅圓覺自中程式公既未嘗以此自多
而世亦無知之者平日所著多散失不收詩文若干
篇錄爲一秩藏于家嗚呼公既無名位事行表見於

世則其見於家庭之間者不過如此而已蓋觀古人
所論每以不肖得志賢者沉伏爲世道恨而我朝科
舉之法至近世而大壞剽章竊句者隨人模擬輒能
取高第前後相望旣用此立顯路掌較藝其所取又
其類也類取類逐歲而增通才實學每患見黜而朝
多倖位其非以是歟若公之終身困屈公固屬之於
命而亦不可不謂之人則世必有同余慨者矣公娶
龍仁李氏司饗院僉正舜岳女有一男鳳儀進士四
女進士金聖沆教官南漢紀幼學李濯李繼華其壻
也鳳儀娶叅判李徵明女生一男一女銘曰

既畸其命胡畀才全問誰尸此而使之然噫其天耶
吾必曰人尚後祿慶以償不身

堂姪元培墓誌銘

季父牧使公之長孫曰元培生十有九年而死己亥
五月之二十三日也將以七月二十六日葬于楊根
先塋坐之原其父達卿呼號寃酷既無所及則托
余爲文以識其藏悲夫吾第大仲盖年二十七而死
於乙未之春元培以是年冠既冠而其姿性之慈良
文藝之早就皆甚肖大仲卒之無子而早夭又一如
大仲而其年則尚不及大仲者八歲豈不益可悲哉

元培始免乳達卿課學甚嚴元培能承意無違其爲人鈍於口讀書比他人甚遲至其綴辭作字則運筆如飛凡經於目者久而能不忘此見其內之敏也天性孝友其父在外久不還必思戀涕泣其同氣雖襁褓者死哭之甚哀屢日不食自幼至壯家庭之間未嘗有叱咤忿詈之聲此又其行之美者也元培病踰年乃死方其病之革也每念當捨父母先死爲之嗚咽衣襟盡濕其父母亦竭力求爲可生而竟不能得斯豈非命也哉夫以大仲與元培之賢苟有一人焉父兄宗黨之所期望者不在於門戶之顯揚必在

於志業之成就乃今有兩人焉則父兄宗黨之慶祝
以爲私門之幸者何如哉顧乃後先天沒若有造物
之爲戲者此豈獨其命之薄而然哉殆天之所以衰
吾宗也歟悲夫元培母清州韓氏郡守起愈女妻慶
州金氏正郎鼎運女女生纔三歲達卿名德孚爲之
銘曰

祖哭孫父號兒理之逆門之衰嗚呼汝死尚安有所
知徒令生者而悲無涯

黃海道觀察使鄭公墓誌銘

公諱是先字百初東萊之鄭皆祖高麗左僕射穆入

我朝有諱蘭宗策勲封東萊君位冢宰謚益惠生諱
光兩領議政謚文翼生諱福謙江華府使贈領議政
生諱惟古左議政生諱昌衍左議政生諱廣成刑曹
判書生諱萬和禮曹叅判是爲公大父父諱載海官
兵曹佐郎早沒贈吏曹叅判娶安東金氏節度使逸
之女以孝宗元年庚寅生公十三而孤二十而丁叅
判公憂二十一而又遭金夫人喪二十四又居王母
憂前後備經荼毒而能自致其誠禮克襄大事宗黨
稱焉壬戌除敦寧府叅奉陞司饗院奉事明聖大妃
之喪以董役勞陞義盈庫主簿移掌隸院司許用薦

除黃州判官莅任未踰年治聲大著病免歸丁卯除
司僕寺主簿以嫌遞差訓局卽移敦寧府判官戊辰
除金堤郡守以治最賜表裏一襲壬申又用薦超拜
善山府使居一年因事辭遞甲戌拜清州牧使遭歲
大殺盡心賑賑民賴以忘其飢御史方伯相繼褒聞
有曰政不要譽而民懷其惠刑不尚猛而吏畏其明
若乃善賑特其細事朝廷嘉之特陞通政階疾解歸
旋拜羅州牧使剔煩撮要事省政舉府中未嘗有喧
呼聲州民謂此邑之安靜若是古所未有判度支李
公世白吏曹叅判徐公宗泰交口薦公謂宜進擢而

領議政柳公尚運嘗從容告上曰我國雖不能行綜
核之政以鄭某事觀之有實者必彰惟其謹於奉法
故初雖無赫赫聲而久則治效自著今若畀以方面
之任其必優於未試之人上亦以爲然及公告瓜廟
堂僉舉公拜水原府使公以丘墓所在且違銓格屢
辭不赴大臣以爲言上并令勿拘公不得已膺命陞
辭日特命引對勉諭以遣府爲畿輔重鎮而軍額甚
疎公括良丁盡補其闕翌年力辭得遞入爲五衛將
除忠州牧使不赴拜僉知中樞府事又兼五衛將除
密陽府使舊例以貢賦羨餘移補官用公痛革前規

盡蠲民役人稱其廉癸未陞拜廣州府尹憊心殫精
修治官事居數年器械之精儲侍之饒皆倍公到官
日秩滿當遷守禦使舉公治績請仍任丙戌始解歸
丁亥又拜忠州牧使坐事罷叙拜掌隸院判度事又
拜廣州府尹力辭不就拜慶州府尹因事辭遷庚寅
拜黃海道觀察使公以爲由蔭路得節旄舊所罕見
累疏力辭既不能得則晷勉赴任時方行詳定之制
而事既新初久未就緒公損益適宜至今行之無弊
耆繫公是賴朝廷以海警爲憂公審察形便多所條
陳且於要害處別設鎮堡以便瞭望連疏乞辭上輒

優批不許公猶力辭不已大臣知公意自於筵席遂
得適付軍職俄拜分兵曹叅議壬辰拜刑曹叅議違
牌坐罷叙拜判浹事癸巳拜安東大都護府使威制
土豪惠綏疫氓邑以無事甲午辭遶拜五衛將乙未
拜驪州牧使干託不行民輸賦稅皆如期無敢後以
嫌適拜工曹叅議丙申求出爲韓山郡守公之爲治
不務新奇必就舊法之廢弛者深究其本意爲之脩
明又能謹守朝法所至率用是道金堤有六十一堤
儲水灌田奸民冒耕其中官捧其稅公大加修築禁
民冒耕者而革其稅是夏大旱一道告飢而惟金旱

不爲灾列邑還穀之制當春分給而必儲其半以備
不虞守寧利秋後加徵剝穀輒傾庫與民而譴謂見
存一遇凶歲無所措手公在清州獨遵朝令謹其收
藏及當賑政旣無料辦煩撓又不請移轉以元穀計
口而哺事逸而功倍若此者可以爲世法矣然公積
瘁成病蒞韓未幾又值溫泉行幸悉力策應病以益
劇不欲貽弊邑民促裝西歸到公州弓院邨舍竟不
起前期飭家人具棺歛之需且戒無受民賻丁酉五
月十一日也以是年七月葬于水原工二鄉先塋丑
坐之原公資性聰明英達屢興州府雖簿書山積呼

訴盈庭而應之常有餘暇積歲滯獄文案繆轆者一
經於目輒能得其情狀奸民以一事再試年月雖久
亦能立辨恥為苛刻督察之政而發奸摘伏有若神
明世或謂公有前知之術凡於為民易弊興利若予
反之飲屈到之芟必殫竭心思苟有所得雖在中夜
必明燭而識之待朝而行綜理微密毫髮不遺惟不
取干譽姑息之政其所區畫設施必在幾先故雖值
急遽未嘗窘質聲樂女色一無所近尤致謹於工作
交易等事商賈工匠之屬未嘗使之至前斯皆公實
跡之表見者也每痛早失怙恃享祀必盡其誠敬撫

愛一第甚篤不忍須臾相離內外先墓之在遐鄉者以時省掃而修封塋域宅心正大而處事則周詳接人和柔而自守則甚嚴口無浮誕之辭身絕侈靡之習不喜交遊罕與人過從所居室庀風雨簾几脩然如寒士家或有勸之改營則曰此先人弊廬累世安此而不改吾何用增益舊制性喜恤困濟窮遠族之以急抵者知舊之貧不能家者輒竭力以贍此又公居家之實行也配貞夫人金氏贈大司憲行旌善郡守自南之女生三男二女男長錫祚進士高山縣監先公沒次錫年次錫範女適進士李廷燮洗馬李紱

側出子賢女爲府使柳德玉妾錫祚娶吏曹叅判金
樛女生一男二女男慎儉女適李山培其一未行錫
年娶進士李世泰女生二男一女男尚儉守儉女幼
錫範娶禮曹判書徐文裕女生一男李廷燮生二男
三女李絛生三女并幼昔歲庚子吾王考代叅判公
按海西節而先君子始與公定交於延城先君子時
年十三而公則加少二歲矣公有所乘驢甚駿先君
子意欲之公輒解而與之無愠色王考與叅判公俱
大驚異先君子每舉以語人曰百初無論其他只此
兒時所爲便非今世人所辦蓋德壽於公有三世之

諡而子山培又壻於公之子今公季胤具狀以公墓
銘見屬義有不敢終辭者謹序次其概而系之銘銘
曰

在漢西京最重吏治其有表著輒擢御史莫存丞相
階茲以致降而不然材不稱位有如我公爵止按使
無怪俗化視古有愧公治伊何遵法罔墜提綱挈領
興壞修利不大色聲逆親事至譬彼霖霖不驟不駛
膏潤所及萌甲同被黃童白叟熙然而喜汝觀四境
魚駭獸恃安我饁粥全我婦子向非我公我其有此
有豪于土有叫于里我公之來噤焉惴惴有蘊則多

其施一二胡不公卿殞于旅次良吏有筆有善必紀
尚載公名列于循吏我名甚直後人其視

亡女沈氏婦壙誌

既云父晉相
則下女字行

亡女某姓李氏祖諱某京畿巡察使兼兩都留守曾
祖諱某黃海道觀察使贈吏曹叅判母姜氏父晉相
女生于肅宗丙戌十五而嫁爲青松沈鎔妻踰二年
而死吁其短矣女生而婉順在父母側無毫髮忤意
事旣嫁而舅姑稱爲佳婦天性淡於物欲見人華衣
服耀佩飾未嘗有跋慕意所得雖尺寸微必分於兄
弟以是父母兄弟皆愛之撫婢使甚有恩意婢使尤

屬心其爲人如此在法又無夭死相而竟夭死其命也歟始女在舅家患病夜起如廁悸而返因得病言笑頗失常度醫治不效嘔血而死斯其命也歟女敏於手凡女紅之事常兼數人其母每歡笑以爲才父嗜食西瓜仁女必力爲求聚自就厨下洗濯曝乾俟父至跪而進之病旣久不良於行見其母患頭風必匍匐出外廳呼其兄俾救視因自涕泣不已以是母益憐之女死以壬寅正月十五日葬于楊根沈氏先山阿吾谷西坐之原銘之父曰叅奉命哲祖曰學生璟曾祖曰吏曹叅議壽亮女死時母病劇家人諱不

言獨其父與其舅營殯以訖于墓重可傷已其父悼
其慧而無年燒瘞埋文千載之後陵谷易位得此記
者尚可哀愍而掩藏也父某記

貞夫人黃氏墓誌銘

黃爲尚州大姓夫人府使贈兵曹叅判埏之子贈左
承旨挺英之孫文科大司憲佑漢之曾孫刑曹判書
李公奎齡之繼妃副提學明彥之母其卒在肅宗甲
午四月九日壽六十七其六月權窆于唐津孟串壬
坐之原後九年壬寅移祔于驪州判書公墓左同岡
而異穴於是副學公具狀屬銘於德壽德壽於副學

姪也不敢辭顧嘗聞夫人撫恤貧族恆如不及又爲
經理其婚嫁於時判書公名位已顯矣猶窘於朝夕
夫人斫斫手紡績以繼之然終不以困故一毫苟取
判書公適嶺臬有幕裨以百金獻此自魚稅出非官
庫物夫人却之曰豈可私受以累夫子清德又嘗造
屋轎董事者稍侈其制輒令毀而改之平居著短布
裳不近珠玉錦繡夫人之屬廡敦儉如此判書公先
娶有子明恆及女二人夫人撫愛均於已出副學公
少孤夫人提誨甚勤居第嘗因雨墻壞及改築副學
將易之以土而取其后夫人責之曰此雖微物當與

此屋居者共之慎毋專也隣人欲得垣內隙地副學
許之夫人又曰此祖先舊基當傳宗家若何得擅與
人夫人以義訓子如此見稚少向日月便必禁止之
飯而遺顆粒席間輒令拾取曰毋暴棄天物夫人之
敬天重食如此嗚呼夫人之行在法當銘又烏敢辭
夫人在家而端莊舉止自然中禮叅判公性方嚴教
子女皆有法度夫人能率循無違故推而事舅姑奉
祭祀俱殫其孝敬又推而待夫黨御婢使咸得其歡
心俾舅姑稱賢而家庭之內卒無毫髮譁言夫人之
賢其有所本者又如此嗚呼是可銘也已夫人有子

趙台彬下疑有
脫字

女各一人子則副學有二男三女男夏宅夏定夏宅
出後明恆女適崔運興元景濂趙台彬女適縣監朴
弼健有二子師休師儉副學方以才識嚮用而夏宅
又厲志篤學夫人爲善之報蓋未艾也銘曰

嗟惟夫人輔相君子而飭身則清而儉訓誨令子而
取與必審乎義惟判書公之所以能成內治與夫副
學公之所以克紹先美世之人皆喜稱道而又孰知
其爲夫人之力蓋判書公之賢固已昭載於史乘副
學公之材亦將漸播於人之耳目至於夫人之德不
有以稱揚其何能流傳於久遠吾銘甚質尚後其勸

貞夫人南陽洪氏墓誌銘

上卽位三年壬寅七月十一日戶曹判書李公台佐
配貞夫人南陽洪氏沒壽六十四以是年九月葬于
豐德府永洞坐艮之原嗚呼夫人之職在於酒食衣
服之間其梱儀閨範必待狀而知之且也然乃其尤
可信者顧不在於家人昆弟之言歟嘗聞龜川公治
家有法度待子弟甚嚴而每夫人上堂問起居必加
以禮貌視遇踰於諸婦至判書公之言則曰修我牆
屋整我書籍尸我內政俾我不以家事累心者繫我
夫人是賴判書洪公之言則曰夫人天資旣高見識

亦明多識於前言往行其論事成敗人物臧否靡不
鑿鑿中理進士君則曰不肖喜與人辯論必戒之曰
處亂世昧言遜之戒吾懼汝之及也論人而以黨色
爲等差則曰心知非而口稱善得無害於心術乎慢
率自高則曰無挾而傲人人其人汝乎惡惡食則曰
荒于業而口腹是循是禽犢之歸也又舉內外祖先
篤行以爲戒戒非一端此舉其大者耳又嘗曰某人
雖從爾翁遊其言甘而諛見利必忘義後果有反覆
之名李君衡佐則曰夫人非閨房之秀乃君子之正
直者朴君文秀則曰夫人子吾吾母夫人吾不知夫

人之非吾母也龜川公官叅判諱世弼夫人舅也洪公名致中夫人第也進士君名宗城夫人子也李君判書公第也朴公判書公甥也是其言豈不信而有徵乎夫人幼有美質言笑不妄從曾祖沂川公每惜其不爲男子及長聰慧絕倫凡女紅之事過眼輒鮮嘗從傍聽諸兄弟讀書又輒能通其大意一經聞覩者皆了然暗記雖源委曲折長且多次第陳說疊疊可聽一家婦孺每就問以當典故云十六而歸李氏事舅姑旣孝旣敬處妯娌親愛無間龜川公深於禮學嘗叅酌古今定爲祭儀及龜川公之喪夫人能遵

而行之必誠必潔家素貧乏而判書公自少冠服未
嘗垢弊飲食未嘗淡苦宗族之窮無依者悉力贍恤
不計家之有無性不喜巫覡凡無稽不經之事一功
裁之以正理無所撓惑其識透理明多類此此又狀
之所載者嗚呼夫人其可謂賢也已洪氏太師悅之
後曰命嗇平安道觀察使丁丑之難殉節栢田曰重
普右議政曰得禹江原道觀察使贈吏曹判書是爲
夫人曾大父大父三世母貞夫人慶州金氏副提
學慶餘之女夫人有二男二女男長卽宗城次宗垣
亦進士出爲季父後女適尹熙啓申漢進士君累然

哀服具幣踵門涕泣言曰願得子一言以識吾母藏
余於進士君有累世通家之誼夫人又余再從姑母
也其忍辭諸銘曰

窈彼西原山蟠谷遠云誰攸藏曰維女士維彼女士
維德之脩爲婦甚辨訓子則義李氏大族在今無此
殊聲同咨衆歸厥美胡不百年綏茲福履烝烝令子
悲慕涕淚丐詩埋幽俾詔千祀誰爲來者尚勿斯毀
領敦寧府事慶恩府院君金公墓誌銘

國舅慶恩府院君金公以辛丑七月二十四日告終
于壽進坊賜第之正寢春秋六十一有司按謚法慈

惠愛親曰孝一德不懈曰簡於是贈謚孝簡而大臣
又援近例陳請贈官議政府領議政訃始聞上震悼
特命舉哀撤朝三日初喪凡事皆令官庀又賜尚方
題湊贈以御衣今上殿下在私邸卽臨弔視殯歛以
其年九月十四日葬于高陽郡西大慈山先壠乾坐
之原上又遣官弔祭命列邑供奠需命內司樹碑構
墳菴三殿又各遣中使護羹終始哀榮之典至矣國
制母后之家不得預外政然夸者徃徃不免叅涉反
是則又溺志聲色徇馬鮮能自脫於有識之譏評惟
公方其在世人皆惜其不克試用其沒也相與咨嗟

歎息以爲若公之賢歷數近世國舅皆無能及者蓋
不惟搢紳大夫雖里兒巷婦其言皆然此其所存於
已者苟未達乎人氣文豈能致是哉公諱柱臣字廈
卿號壽谷系出慶州新羅散順王之後七百年間圭
組名德史不絕書至齊肅公相佐我太祖爲開國功
臣封雞林君齊肅之孫從舜判漢城府尹謚恭胡恭
胡之孫千齡以文行著官直提學生萬均官大司憲
贈領議政月城府院君出爲堂叔持平贈左贊成引
齡後寔公五世祖高祖命元左議政以勲封慶林府
院君謚忠翼曾祖守廉僉知中樞府事贈領議政祖

南重禮曹判書慶川君謚貞孝考一振成均生員有
潛德早世配豐壤趙氏成均進士贈左承旨來陽女
左議政文孝公翼之孫領議政延陽府院君李公時
白之外孫以公貴并有封贈公五歲而孤趙夫人教
督甚勤公能遵而無違稍長益自力爲學在交河野
塘讀書至夜分不撤趙夫人虞其疾止之公故低其
聲不使外聞甲子趙夫人疾不起伯氏進士公又繼
沒公竭誠經紀俾無遺憾賻贈之物不爲他用曰君
子不家於喪饋奠之具不以干求於人曰享先不空
苟也公素清羸至是而益柴綴叔父楓崖公欲勸以

董桂之滋微示其意公涕下泫然有不忍聞之色楓
崖公竟不能畢其說丙子中司馬一等論者猶以不
居魁咎主司崔相公錫鼎適掌銓卽補掌苑署別檢
以示其悔陞歸厚署別提轉司憲府監察戶曹佐郎
出爲順安縣令政不尚皎厲而吏戢民安壬午九月
我惠順慈敬王大妃殿下膺德選正位坤極公卽拜
敦寧府都正進秩爲領敦寧府事封慶恩府院君又
兼都摠府都摠管尚衣院提調冬上引見公于便殿
公語中官初見君父不可無承旨史官中官以非故
事不敢啓相持久之上促召然後始入對及啓覆公

又從諸公入侍諸公出而相語府院君進退雍容一
何習熟也癸未特旨拜扈衛大將時上久不預朝臣
以文書繁委爲憂公於野史中錄柳眉巖希春所論
令承旨看詳公事抄記其要俾上易省覽等語又附
以已見具劄以進丙戌以上卽位之三十年稱慶進
宴庚寅甲午皆以上疾平復進宴已亥又以上壽六
十用太祖故事入耆社稱慶進宴公輒爲都監提舉
受鞍馬之錫慈聖患痘瘕及紅疹公又連直宿禁中
旣平復特賜厩馬臧獲又命子壻一人除職庚子六
月肅宗昇遐公與諸大臣入視襲歛以慈殿有未寧

之候因直宿二十餘日上愍其病悴命歸家調治既
又聞其父食素特遣中官勸肉至翌年秋公遂寢疾
上遣御醫視病病革猶不廢鹽櫛精神不少爽醫來
必正冠服端坐以待飭以後事皆纖悉有條理公於
平日嘗遺戒諸子板材必用君錫勿得效俗換買良
品外方致賄之稍厚者及提舉諸司之奠前官俸并
令勿受又嘗封置襦衣一襲及一錦囊每泣語此吾
母手線異日宜置吾棺中又恐諸子惑於堪輿之術
違先壠而卜他則爲文以戒曰吾死之日雖起塚牛
眠之地山非大慈則化者之悲無異蠅蚋之姑嘬雖

掩土螻蟻之穴原曰大慈則斯丘之樂誠以父母之
孔通也又曰吾既早孤且於親喪貧不能盡誠我死
章服外切勿用紋綺苟有恩賜只斷數尺納于棺中
至是諸孤并遵治命不敢違云公天姿恬雅清肅動
止有度體若不勝其衣而操守貞確溫然而可親穆
然而不可狎望之知其爲正人君子也性至孝事大
夫人愛敬篤至大夫人雖窮居鮮歡以公故輒時開
口而笑每慟早孤語及先故淚涔涔承睫讀書至孝
子養親與夫孤露悲慕之事嗚咽不忍竟凡追遠享
祀之節靡不用其誠鬻賣臧獲營治誌碣不以力之

不建而有少倦也築室先壠扁曰永思月一徃省率
以爲常少時貧無馬輒步徃旣貴非呈告不可率意
徃來嘗於登對時陳情曰臣平生有不識父顏之痛
丘墓近在高陽而不敢每乞暇願以無公故之時僂
服徃省以少伸私情上哀而許之事叔父楓崖公如
事嚴父楓崖公旣沒事叔母權淑人如事楓崖公生
則奉養于家盡其誠禮沒則經紀其後事朝夕居喪
側不廢哭泣伯姊早寡季妹早夭或迎養于第或撫
恤其家皆曲有恩意伯氏進士公有才學早沒公撫
育其二孤顧復甚勤二孤甫弱冠相繼夭沒公終身

痛惜使其婦同居一室視遇如親子女事堂兄清風公不以尊貴自居入其門必舍車徒於外清風公至則下堂而迎隅坐終日無惰容送之輒至中門常以惠人濟物爲心賙窮恤匱恒若不及每讀范文正今得厚祿欲以養親親不在矣及獨享富貴不恤宗族異日何以見祖先於地下等語未嘗不掩卷歔歔也所得祿俸及外方饋遺別置外庫雖微物必分諸宗黨故舊其累封題識必謹曰不如是非待人以誠也恒居必整攝衣冠終日儼然未嘗跛倚左右圖書皆位置齊整口不出鄙俚之言體不設傲惰之容甚喜

陶侃運甓之事又愛表記莊敬日強安肆日偷之語
常書諸座右衣無華美案無兼味行於道路不呵辟
人常曰古人云畏首畏尾身其餘幾其言恍若覩出
吾今日光景出入禁闥二十年屏氣怵惕視瞻不回
嘗入 慈聖有幼少宮人立殿廡不避同列問爾何
不避曰我雖在此府院君未嘗舉眼而視宮中傳爲
美談肅廟遘豫多年公昕夕奔走以承起居上慮其
病屢命調息而公終不敢退休於家常處闕下聞雞
而起待漏而入十年如一日雖勞悴困頓有所不計
公行身之大者如此於官事無大小必盡其心吏胥

有罪輒囚係數日俟怒解然後始浚笞而必察其強弱飢飽以輕重其罰曰昔宋仁宗未嘗詈人以死夫以人君之尊猶且不以死詈人爲官吏而刑人至死可乎在順安吏有飲罪人賂酒而故縱者公按法施刑一日其妻急詣公訴其夫瘡重將死公惻然咎獄吏之不告者而命醫持藥救之吏賴以無死每語人我於其時慮其或斃寢食不安者數日云掌樂院宴饗樂章多殘缺顛錯公爲補葺聲正擇其近雅者用之嘗啓筵中曰扈衛軍官皆善射但苦弓箭不備尚方蓄儲比前頗優而漢史有願賜尚方劍之語古者

兵器亦似在尚方今若措置弓箭有緩急分給軍官
則可以得力矣上特允其請尚方之有弓箭自公而
始兩闕尚方皆挾陋傾賴公又改建而增其制御服
所藏舊無別所乃初立冕服閣位置皆井井有法公
乃喟然曰吾事業其止此耶蓋亦自惜之意也公既
處地與外朝有異其言論無所表見而當庚寅冬入
對便殿時適有邊警朝議多端公進曰所謂海寇未
知在何地而既不知其所在則其非大寇如倭可知
以壬丙事觀之壬辰之亂非一朝卒然而發也二百
年間屢犯邊耕習知我國淺深至壬辰始大舉入寇

丙子之難亦自丁卯生釁自古爭地爭城之寇未有一朝突入者今海寇既非立國之大敵而未嘗一投足於我境則海外之人安能明知他國兵力與山川險易一舉直搗如入無人之境乎今朝家不患命將出征而先議去邠致令中外騷擾誠爲失體天下事變無窮將來事雖不可預料以卽今事機言之二三十年之間恐無他虞矣上善其言深加開納辛卯冬藥院直宿久不罷公因登對請罷曰昔宋仁宗有疾久不視朝一日以愈召呂夷簡等夷簡緩轡徐進仁宗問來何遲對曰陛下方在遑豫一朝急召臣臣若

奔馳以進人心必驚動耳仁宗以爲得輔臣體臣今
請罷直宿意亦如此上然其言卽命罷直宿卽此二
事亦可以見公識慮之精明也公嘗作不殺耕牛辯
曰古者牲牛耕牛不同任君有故而殺者乃牲牛耕
牛古未嘗殺也古人於凡禽獸猶且見生而不忍見
死狗馬死且儲帷蓋埋其體況於引重服田之物寧
有旣食其力而忍又殺而食其肉之理乎以是知古
人未嘗食耕牛也因終身不食牛肉又嘗戒子弟曰
伊川先生有言人於外物奉身者事事要好苟得外
物好時却不知自家身與心已自先不好是誠格言

而不徒身與心不好自家福與祿亦自減損也又曰
古人言凌意而往則須用己力爲學須自知其當爲
而用力何待父兄先生之督責也又曰今雖有豪傑
之士生知之資苟不資於讀書其於在家居官雖自
謂觸處洞然於一事必有一處塞處又曰今人所見
所行每每就下病根只在賤用其身若知是身非千
金萬鍾所可易則其於做聖思過半矣又曰新長之
兒志慮未定不宜教以雜家書宜先授小學語孟使
知所向又嘗曰人當於容貌辭氣上用工辭令容止
苟不能自飭要管甚事又曰人要沉重安靜如水中

磐石方可有用浮露躁率最害身心此又公緒言之
可傳者也公性喜書自經傳以下百家之籍無不旁
通晚亦晨起讀書雖疾病未嘗廢以爲世間至樂無
復此此爲文以理爲主平鋪典雅不事雕琢不用陳
言先輩諸臣公莫不推服有文集若干卷夫人嘉林
趙氏永平縣令景昌之女翊衛司侍直錫馨之孫禮
曹叅判竹陰先生希逸之曾孫育二男三女男長後
衍高陽郡守娶縣令尹沅女有一男次九衍娶朴弼
耆女有一女女長適郡守李德鄰有繼子厚培次惠
順慈敬大王大妃殿下李適進士尹勉教有三子側

出二男一女男可行乃行女適具翼佐德壽少而識
公又嘗忝爲司馬同榜公忘年而屈與之友建公戚
聯椒掖其從遊不得復如平日然慕公之德未嘗一
日而忘也嘗與朋友私評公以三言曰介曰和曰密
人之介者必不能和而公則介而能和人之和者多
不能密而公則和而能密人亦多以余言爲得公之
實忽忽四十年間人事屢變今公墓草已五宿而余
髮且種種矣撫念今昔每用嗟悼高陽兄弟以公幽
堂之銘見屬義不可辭遂按狀序次而系以銘曰
操守也貞辭受以義強名爲介詐足盡義溫粹之姿

璞蘊山輝強名爲和
其或庶幾木屑竹頭
布溫裝船士行精密
公則有焉苟處巖廊
厥績有煒惜閱其庸
俾畏首尾溫室有樹
絕口不言春冰匪薄
銀艾匪尊公則然矣
國有所恃德固多有
而不壽畀公孝于親
在朝惟忠惟忠惟孝
惟公始終重宸興悼
長秋纏悲壤惟高陽
原曰大慈斯丘之樂
克遵公志南望珠丘
松栢騰翠君親孔通
神道攸求來者有考
銘以揭幽

尹淑人墓誌銘

余友前泰仁縣監朴君子龍以其先妣尹淑人錦山之阡久無幽誌具狀而屬余銘嗚呼猶吾母也序而

銘之敢不敬乎謹按淑人系出坡平父右議政忠正公趾完大父吏曹判書絳曾大父工曹叅議民獻母密陽朴氏贈司憲府持平天球女淑人生而夙慧凡言動舉止一惟天然不事矯飾姊妹咸愛慕至或私相模倣十六歲歸于芝浦朴公諱鐸寔贈領議政行吏曹判書文孝公諱長遠第三子淑人在室而以忠正公爲父旣嫁而爲之舅者又文孝公文孝公特加愛重語諸女吾婦非凡人若曹皆所不及也忠正公則曰惜此兒不爲男子大吾門有事必與議雖國家大計或問及焉其不合於忠正公之意者鮮矣父子

間輒相與爲知己夫父與舅稱其子若婦未足爲公
言者此恒人之謂耳詎以二公之名德識鑑而蔽於
私哉卽此而淑人之賢可知已至若子龍所以狀先
懿則又不過曰寬弘正定而已噫其盡之矣蓋淑人
中心豁然無滯礙平生人不見其有暴怒雖婢僕之
賤未嘗加以惡言樂道人之善凡於衣服飲食亦皆
舉其美者而稱之訾毀之言不發於口一家諸孫至
嘲以某大母雖見惡物必稱其善是皆寬弘之著乎
外者也性又通達事理常喜令子姪讀書而聽之其
論斷古人得失無不中窾承事君子未嘗有戲嬉驕

情之容閨門之內斬斬如朝廷嘗曰吾於外事無心
爲病豈有察人善惡之意而人多憚我常恐以其行
事見露於我甚可醜笑云此又正定之見於外者然
也嗚呼最淑人之德美世之賢士大夫或有媿焉淑
人以癸卯七月二十四日卒于泰仁官舍享年七十
二以是年十一月葬于錦山梅谷之原有一男一女
男卽子龍名亮漢丙子進士壯元今從蔭仕女適佐
郎吳遂郁泰仁有一男一女男芝秀女適

佐郎二女洪儀漢金光進其壻也銘曰

忠正識洞文孝鑑哲子于婦詎私之蔽父諂以疑

曰汝余契舅亦有言惟家之慶懿斯爲德惟寬惟正
士也猶難躬則允蹈幽墟有銘用後是告

尹文伯墓誌銘

尹文伯治博士業其名藉甚塲屋間未幾而死余不
及識而識其弟雲仲雲仲每說文伯之懿涕未嘗不
交頤旣又聞於識文伯者其言與雲仲同雖微人之
言吾固不疑雲仲之私也文伯之友多誅文伯雲仲
持以示余若柳上舍太垣崔持平尚履李洗馬夏坤
李上舍聖臣皆世所謂能言才子也其稱述文伯備
矣而崔持平之文尤賅而哀其言曰君八歲而孤能

自勛學弱冠遊黌舍每製輒居前列嘗見君在場屋
環而嚮者十數人君方左右談龍若不以得失經心
者日昃始下筆洩如宿藁一座盡驚其才敏如此形
神俊邁談說古今偉然可聽與人交不設町畦杯酒
間詠調淋漓然其自持斬斬面片人過不少忌急困
好施有古烈士風嘗見人遭祲變者雖至親皆不敢
通君獨奮然護其喪而恤其孤人亦以此多之此君
之爲人也又曰君每以不及致養於親爲恨雖甚貧
當祀能前期經紀巨簋務使明潔友弟妹寒其寒飢
其飢教諸姪無父者數人俾有成而婚嫁以時君內

行之篤又若此蓋其所言與余所嘗聞於雲仲及識
文伯者無不合雲仲又爲余言君嘗省叔父於金溝
縣濱歸使宦僮檢衣服僮諾積火爐上俄而火發烟
騰座中皆驚呼君獨夷然不色變人謂當取償於僮
君笑曰兒誤耳奚償之云矧其貧耶乃盡以燼餘與
之僮爲感泣此君弱冠時事其器量已如此夫以君
才行之美卒落拓以死爲士友所共哀斯豈非命乎
命者得於天而知不能規乎其始者也悲夫君名敬
龜恭原人父某進士大父某戶曹正郎曾大父某司
憲府掌令母昌寧曹氏其卒以己亥四月九日距其

生癸亥爲三十七寒暑君辛卯中司馬凡三娶竟無
後其葬在楊州加五里三山洞坐申之原雲仲名敬
龍銘曰

垣推氣數之戾聖咎有司之格夏援羅隱故事欲贈
以一第履咨施才術於閭閻是紛紛者闔且密若始
自迭荔推出固若將有爲俄溲然而收去蔑景響之
可追譬孤埋之而孤相之吾如彼何哉吾如彼何哉
噫

先妣墓誌銘

先妣姓沈氏青城伯德符之後考諱某贈吏曹判書

祖諱某僉知中樞府事贈吏曹叅判曾祖諱某弘文館應教贈吏曹判書妣李氏禮曹判書諱基祚女贈貞夫人先妣少孤李夫人教訓有法既長歸于我先府君時舅觀察使府君及王舅同樞府君皆下世而姑徐夫人及王姑沈夫人并在堂先妣既入門兩夫人交口稱賢婦先妣亦小心敬事毫髮之微不以自私乙卯先府君見忤於時屏居砥峽之釜潭躬耕養親凡六年己巳又謫南海君山亦六年先妣皆從之乙巳又從不肖居楊山先墓下三年而沒論其窮約乙卯甚於乙巳己巳又甚於乙卯而先妣所以前後

處之者皆安之若命未嘗見憂惱之色設於顏面惟
手執女工老而不懈先府君歷官清要出典一州三
建節鉞不肖亦竊位三司三廩郡紱先妣與有其榮
而未嘗有侈汰之容處患難處逸樂不見其有異焉
通詩小學及少微通鑑又略曉天文奕碁而皆不以
自見性恬和宴靜寡嗜欲少營爲喜怒不失色其於
七情皆未嘗過用稟質弱甚而其能壽且康寧由於
此蓋先妣爲人未嘗修飾以近名也而人自然歸其
德雖其稱先妣者亦不能口舉其事而心服其所爲
世之婦女類喜談人長短抉摘隱微而至先妣則咸

曰苟作人得如某夫人百十之一詐不爲賢明婦人
哉自一家上下皆莫知其何以致此則輒曰心德之
孚于物也能化豚魚而況於人乎嗚呼此非不肖之
私言也宗黨之所公言也措紳之所共傳也旣病却
藥不肯服神識妄妄如平日正席恬然而逝丁未七
月十三日也距己丑爲七十九寒暑以其年十月丁
酉祔葬於楊根水回村先府君墓左丑坐之原先妣
有子二人女一人子長卽不肖魁辛卯菊梨原任禮
曹叅議次德海有雋才早死曾魁癸巳司馬女適井
邑縣監沈鳳儀不肖有一子三女子山培女適崔趾

興沈鎔尹得興井邑一子一女子道希女適趙德裕
嗚呼輟哭記事雖哀隕頓絕不能文字而不敢溢不
敢誣取以告於後之君子云

附先妣手錄外王母遺事

自兒時事父母以孝每當父母晬辰與諸兄弟精具
酒饌以進歲以爲常兄弟雖多其友愛之篤措紳家
所罕有王考僉樞公晬辰必備衣服二件獻其一而
藏置其一亦歲以爲常吾兄應教公兒時教宥踰度
先妣每加誚責及其登第之日跪白於先妣曰兒於
兒時荒嬉廢業母常加以蠶杼仍語兒吾卽未亾人

目前只有汝及汝妹吾視汝妹如珍玩視汝若盲之
有杖所以不得從汝父於地下者徒以汝二人在耳
汝今如此吾何以生爲仍涕泣連如兒於其時惕然
動心痛自刻責自是謝絕交遊杜門讀書每當舊習
聞發之時輒思吾母誨飭之言廢然而自返惟俛首
佝畢之兀然於場屋屢赴不利自傷有負母訓乃今
始有以藉手以負吾母也先妣爲之感涕久之蓋先
妣酷愛文學凡於教訓兒少勤勞不憚恒言吾子孫
中苟有能文學者吾之愛重寧有窮已哉先妣於庚
寅之喪成服時衣服至虞卒哭終不改著一日所啜

只是稀粥數溢而已。又則有嘔逆之症。粥亦厭進。氣息如綫。然猶倩人扶曳。朝晡哭奠。必六時躬參建奠。幾不得全。外王母率置座側。涕泣勸諭。頻灌以米粥。又則以蒸飯繼之。耳目始有所聞。覩精神始有所收。聚至癸巳七月。遭王母喪。八月又遭外王父喪。先妣質既清弱。而連遭巨創。自此病情深痼。每至秋必飢。雖藥治多方。而竟不得享年。至今追思。猶神銷骨驚矣。

先妣病既革。顧女孫尹氏婦曰。吾有小方底在某所。宜謹藏。勿失。先妣既沒。不肖取而閱之。中有二

小紙其一則區處家事者其一則乃手錄外王母遺事數條也不肖覽未訖泣涕橫流紙爲之濕竊訃先妣之所以爲此者豈偶有所觸感而漫錄以示子孫歟抑欲論次遺事以備後考而病情猝視未及卒成歟意旨所存盖有不可得以知者矣然人子之於父母雖等閒遺跡亦必欲收藏勿失况記先懿者哉茲敢取本文畧加刪潤以藏而仍念外王母才藝絕人女紅之外如天文雜數多所曉解愛人喜施得於天性嘗有女童飢卧路中困殆垂斃聞之惻然哺以糜粥少甦則絲其身而繼以

飯健而後遣去其女後爲邑宰側室饋送不絕辛
亥歲大飢沼門化飯者蔽路每日炊數斗飯置大
門外隨其至而施之全活甚衆此皆不肖平日所
稔聞於先妣者而不載於錄中故并記之附於左
方云

叔父知敦寧府事府君墓誌

先叔父諱某字某我李氏籍湖西之全義縣遠祖諱
棹佐麗祖爲開國功臣官至太師入我朝孝靖公諱
貞幹以孝著六傳而爲北道兵馬節度使贈領議政
諱濟臣世稱爲文武全才生諱耆俊承文院副正字

贈左贊成生諱重基新溪縣令贈領議政生諱行健
同知中樞府事贈吏曹判書生諱萬樵黃海道觀察
使贈吏曹判書娶穆陵朝駙馬徐公景衢女有二丈
夫子長叅判府君諱某季郎府君也始仕爲內侍教
官內則掌樂主簿禁府都事平市令宣惠廳郎司僕
判官掌樂僉正翊衛司衛率外則通判黃州歷延安
密陽淮陽茂朱四府及清州公州黃州三牧惟天安
有故不赴在梨園釐正樂譜提舉者將奏其績府君
歸其功於典樂而不自居在黃以勸獎儒學爲務親
授以小學家禮等書數年之間蔚然有作成之效於

清及黃之再莅值歲歉竭誠賑飢民賴以全西路供
勅爲巨弊而延民乃不知有勅行每書成生廉政成
勤六字於壁以自省其爲治皆自此出所莅咸有去
忠初以善治陞秩通政爲敦寧都正曹司衛將繼以
寶篆書寫陞嘉善爲同知敦寧府事又以男德孚官
侍從陞嘉義終又以寶篆書寫陞資憲爲知敦寧府
事丁未九月十七日告終於正寢春秋七十三葬于
楊根郡西水回里先壠丑坐之原德壽旣謹書官閥
生卒如此而竊念先叔父素篤人倫宜聞於世示於
後則輒敢繼書曰府君六歲而孤哭泣哀毀如成人

自疑童而服有所殺也凡袁經履杖皆持此於叅判公所御少有異同必令改之徐夫人善病府君左右扶護藥餌飲食非其手不進數十年如一日及其疾革與叅判公血指以箸居憂三年未嘗進蔬果雖盛暑不脫衰經觀者以爲難旣免喪移其所以事觀察公者而事叅判公移其所以事徐夫人者而事丘嫂沈夫人朝夕侍坐不設陪容叅判公性峻急時或譙責甚厲而和顏承受少無忤色叅判公嘗謫居南海之君山凡六年府君涉海徃省歲一再不廢在京得叅判公手書則每念其艱苦疾病之狀輒爲之嗚咽

廢寢與食在黃聞叅判公以畿伯陳病解職亟馳省
晝夜躬自救護及喪自含歛至鞠奠必誠必慎不以
委諸人每哀哭目爲之盡腫其於沈夫人日必再三
候問出告反面事小大皆稟議而行沈夫人恒以詔
諸子女曰若輩事我固應不及但未知古人亦能如
是耳凡於爲先之事殫其誠力自墓道之石幽宮之
誌靡不拮据以樹以埋而同樞公之外王母白氏墓
在楊州金臺山繼嗣斬而樵牧不禁百餘年矣府君
爲改其封策而豎以矩碣在外官宗家祭奠之外雖
旣祧之墓堂從兄弟姊妹甥姪若外若內必致助祭

之需聞者爲之感歎焉府君性仁厚和緩待人不設
畛域然內實精詳不忽細行每言居官要譽甚於貪
墨善事得官無異盜賊又曰儉必致福奢能挺災此
理毫髮不爽家居朝夕假貸猶患不給人或疑其矯
情府君笑曰人情不甚相遠廣買田宅爲子孫計吾
亦豈異於人之情哉願百口待我而哺數十年矣此
爲國恩之大何暇更圖贏餘爲日後計乎此皆府君
行設之表著者德壽旣謹書如此而又竊念先叔父
有才有識慮宜聞於世示於後則又敢繼書曰府君
少解岐黃之術亦頗曉乾象并多奇中因有所懲中

年以後不復留意深究篆籀之法推其點畫盡得造
字之本意篤論者推以爲近世所無又精於禮家知
舊中有禮節之疑晦者輒來質問少與朴玄石講論
禮書玄石每字呼府君而語人曰禮家儀章度數甚
煩亂吾因某而覺悟者爲多云甲戌歲上命廢張嬪
徐相公文重時判西銓欲陳疏請議大臣府君於徐
公爲內外堂從力止之曰此有大段得逼處徐公不
肯從及其遭臺噴狼狽始歎曰悔不用君言此又府
君執識之過人者也府君初娶鄭氏松江相公曾孫
普衍女生二男二女後娶尹氏梧陰相公四世孫均

女生一男男長德孚文科弘文館修撰次德載文科
承文院權知副正字次德顯女適士人洪泰猷府使
尹鳳韶側出男二人德寅德範女適金光俊德壽不
天早失嚴訓繫吾母及叔父是依是仰乃昨歲秋而
吾母與叔父後先棄背罪裙荐酷號叫靡及痛其可
言耶痛其可言耶壙宜有誌伏書泫然

沈淑人墓誌銘

淑人青松沈氏自青城伯以後世有勲戚著于國史
父全羅道觀察使贈左贊成權大父弘文館校理贈
吏曹判書熙世曾大父領議政贈謚忠靖公悅母全

義李氏黃海道觀察使贈吏曹判書諱萬雄女淑人
生而妍秀明悟在父母又一女甚見憐惜年十五擇
配歸于僉正趙公諱泰壽生二子駿命龜命丁未閏
三月二十四日卒于駿命清風任所壽七十蓋淑人
內外俱名族贅成公賢而有重望旣嫁而僉正公又
賢有孝友至行而子又賢而龜命尤以文著名舅孝
憲公貴極人臣門戶赫然世之稱福義之全者咸以
歸之於淑人然淑人始嫁孝憲公官未顯家甚貧而
僉正公少嬰奇疾沉綿數十年米鹽之細藥餌之煩
靡不用心拮据至斥賣衣服粧奩之具以足之勤苦

勞悴未嘗有一日舒泰食正公室踰中身而沒而兩子又皆無子淑人之窮於是乎爲甚矣雖然淑人教二子甚勤每提坐側執筭課讀今二子亦皆成立有聞於世是淑人之教行於二子也孝憲公老而繆凡其一衣一餐淑人無不手治必使整潔完好以至附身之具日月製者亦莫不預具而謹藏之孝憲公友於兄弟又喜賓客淑人曲意承奉推甘分煖旣無所惜而酒肉之供亦未嘗闕孝憲公嘗曰吾家之興賴是婦是淑人之孝彰於家庭也五妹二姒皆以女儀事淑人淑人亦慈愛無間嘗捐一婢以哺甥女之無

乳僉正公仲弟內外俱逝取女養之嫁不失時遠近
親戚凡有吉凶婚喪必皆以淑人爲依歸是淑人敦
睦之行孚於親黨也平生手不釋女工以身率先每
晨坐開戶賦功婢僕稟事書函叢集左右酬應無少
留滯用度艱乏而不形其憂惱經營浩大而不見其
勞攘精神意度常綽然有餘淑人治柩之政著於事
爲者又如此最淑人之德宜範世垂俗豈但爲一家
誦傳不衰而已然則謂淑人福美之全亦不爲過夫
所謂福者豈必富厚多子孫也哉嗚呼其可書也用
卒之五月丙寅權厝于忠州省洞己酉五月壬戌改

卜水原八吞面負寅之原并遷僉正公舊壙而合窆
焉孝憲公諱相愚官至右議政駿命所後子名載福
末冠淑人余內姊也故於二君之謁銘不敢辭銘曰
恭惟吾母閨範之純不妄許人儼必其倫在諸姪中
獨稱淑人曰惟敏達亦惠而仁淑人之沒在丁未春
吾母哭泣過時而悲及秋屆節凶褶繼之吾生瑩瑩
均駿洎龜德備爲福式昭令名願慰孝子勿之毀生
前月忍慟埋文先塋今茲漬淚又書姊銘千載之下
尚識余情

從叔母柳孺人墓誌

孺人文化柳氏麗朝太師車達之後建本朝左議政
寬號夏亭爲英陵朝名臣八世而司導寺僉正諱夢
翼贈吏曹判書卽孺人曾祖也祖諱泓文科海南縣
監贈左贊成考諱誠吾刑曹佐卽贈領議政妣潘南
朴氏左贊成錦溪府院君東亮女孺人十五而歸李
氏翌年乙未喪所天又七年壬寅朴夫人沒又七年
己酉姑羅孺人沒又五年甲寅考佐卽公沒又十九
年癸酉所後子德卽死翌年甲戌季學生公沒又二
年丙子兩孫相繼死又七年壬午子婦朴氏死蓋孺
人在世七十四年而生人之窮毒備於一身凡議政

公尚運每言吾閱潘安仁寡婦賦竟不忍再讀聞者
悲其言與兄議政公及弟大諫公尚載友愛篤至接
屋連牆朝夕相守議政公嘗謫湖中又嘗退居廣陵
孺人皆從之而公亦皆先孺人後先沒孺人益榮然
矣以癸巳八月十二日卒十月合窆于楊根水南里
坐美之原孺人慧悟絕異於人生數月而能言凡於
女紅諸事經眼輒解不煩姆教尤善記古人賢不肖
及當世士大夫族派既老人或有問者輒曰某爲某
事爲賢某爲某事爲不肖又曰某爲某之孫某爲某
之族其源出於某不待按譜考牒而一一辨說奉先

祀必盡誠敬不以家計之貧剝有所殺禮議政公疾
既革家人有欲事祈禳者孺人峻辭禁止曰吾凡名
位已著其存其沒當關時運但宜聽天所命而已奚
用是爲也其識理不撓多類此孺人晚年復取德卽
第四弟德輝爲後登辛卯司馬初娶順興安斗章女
生一男一女繼娶光州金震膺女生一男一女男長
東培娶驪興閔正濟女生一男女長適士人尹懃餘
幼從叔父諱徵善清江公之五世孫也是爲誌

從叔父學生府君墓誌

公諱徵獻字子能李氏之籍全義者皆以太師棹爲

祖入我朝孝靖公貞幹善養百歲母英廟廩其孝贈
秩錫宴有慶壽錄行於世其後六世北兵使贈領議
政諱濟臣以文章氣節著世稱清江先生寔公之五
世祖也高祖諱耆俊官承文院副正字贈左贊成曾
祖諱重基官縣令贈領議政祖諱行健官同知中樞
府事贈吏曹判書考諱萬鍾少英特稱爲國器不幸
短折配羅州羅氏府尹贈叅贊緯素女有二丈夫子
公其季也公生而不識父顏每以爲天下至慟自在
童年不與羣兒嬉戲及長有家室尤不敢以恒人自
處不與人交遊不事舉子業間雖爲親勉赴而求其

志及羅孺人沒廬于墓下三年啜粥未曾開口作笑
容雖同室之人終喪之前未嘗見其齒服闋仍築室
深峽絕意榮進待人一以誠信無貴賤之間鄉人化
其德焉嘗泣請於介嫂柳氏曰我有至痛無所洩欲
陪父母廟躬執祀事少伸罔極之情於未死前敢以
請柳氏許之乃構廟而奉主每值忌前期齋沐袒割
必親及將事號痛若在初沒聞者無不感涕焉卒于
甲戌二月二十八日春秋五十葬于楊根西老老時
負英之原初娶安東權懂女生一男繼娶慶州李時
昌女生四男三女李氏有至性純行後公二十一年

甲午正月十六日卒壽七十二葬祔公墓男長德邵
娶縣令朴鑽女出爲伯氏後早死次德普娶光州金
震元女生一男次德淵娶仁同張世栻女生二男次
德輝娶順興安斗章女生一男一女繼娶光州金震
膺女生一男一女次德尚娶清州韓時大女生一男
四女女長適俞炅基生一女次適高漢錫生二女次
適洪錫度無後公行誼可書者不止於是而諸子相
繼夭死只有德輝德尚旣不能追記稚藐之事一家
長老亦淪喪殆盡無可以徵者德輝只錄所嘗承聞
於兩叔母者托余爲誌謹序次如右以爲誌

再從兄施老氏墓誌銘

公諱德普字施老全義之李肇自太師棹入戒朝北
兵使贈領議政諱濟臣以文武全才為穆陵朝名臣
即公之六世祖也曾祖諱行健文科同知中樞府事
贈吏曹判書祖諱萬鍾早沒考諱徵猷潛德不仕妣
慶州李氏通德郎時昌女公性純實簡默類若有成
而竟夭折卒于癸酉九月十七日得年堇二十一葬
于楊根西道莊洞負巽之原娶金震元女生一男寅
培娶宋廷郁女生二男三女皆幼記昔丁卯之歲先
君子出宰忠原携公以自隨公與余同年生而先余

三月允讀書嬉遊未嘗不與之同公既早死而寅培
又早死余獨竊位于朝髮且種種矣每見寅培諸孤
未嘗不撫而悲之今公之弟德輝托余銘公墓執筆
而不知涕之流落也銘曰

穀之輟而崩之闕不知其初之無生也藏之深而識
之謹尚無毀傷于茲瑩也

再從弟士深墓誌銘

君諱德淵字士深李氏世爲全義人君簡重精密立
心不苟少孤家貧從叔父叅判公取以教養年四十
二戊戌七月十三日卒葬于楊根道莊洞負午之原

考諱徵猷祖諱萬鍾曾祖諱行健文科同知中樞府
事贈吏曹判書妣慶州李氏通德郎時昌女妻仁同
張氏士人世拭女男長完培娶順興安邦瑞女次厚
培娶奉事尹東泰女出繼族父德隣後余與君同龔
數十年名為從曾祖兄弟而乃其情則同胞也君之
沒余為經紀其後事而顧未暇以文字紀君之行實
今君之弟仲翔托余為墓銘余既書余之所知者而
仲翔又為余言君恬雅自持不與人較又不喜劇談
終日如愚無一毫外物之累此皆人所難能者其言
為能得君之深者故并記之如此叅判公諱徵明仲

翔名德輝銘曰

位常斯乎才壽每嗇於賢從古如斯匪今獨然嗚呼
士溪奈何于天

再從姪寅培墓誌銘

余既為從叔父學生府君墓文矣又為再從兄施老
氏若弟士溪墓銘矣仲翔又請為寅培墓誌余曰後
死者惟我與爾爾狀而我銘之其得已哉乃書曰寅
培姓李氏字明叔再從兄德普施老氏之子也母先
州金氏士人震元女君少聰穎絕人約齋柳相公與
語而歎曰此兒文才如此終必有成然以母金孺人

痼疾數十年君惟醫藥治療是急業隨以廢年又三十四而沒甲辰十二月二十八日也葬于楊根道莊洞哇蕕之原君性端方廉潔見人之不善若將浼焉雖一毫之微苟非其義未嘗取於人其行誼之美不及古人者鮮矣而卒無成以死豈非命也始君之考施老氏年二十一而沒曾王考府君二十二而沒惟王考府君五十而終而君則壽量過兩世而猶不及於王考府君蓋連四世俱不免於夭矣重可悲也君娶恩津宋廷郁女生二男三女并幼若其世閥具載先代碑誌茲不詳列云銘曰

誰之不如乃止於斯四世有塚東西累累銘以識之
涕其隕之

芝浦朴公墓誌銘

世之學者有二病焉安於卑近而立志不高也狃於
曰循而作綴無常也惟芝浦朴公之學以刻厲勤苦
為一生家計故其言曰舜何人也余何人也有為者
亦若是所謂有為者讀聖人之書研窮講磨使吾之
處心行事不少抵牾於聖人之訓斯為有用之有為
外此則皆無用之有為也是以每讀一書沉潛反復
不得不措小而應事接物大而出處進退必察天理

人欲之分以定內外輕重之辨蓋其學以誠實為敬
為本涵養窮格為事本既立矣功既深矣推而至於
一動靜一語默不敢有踰於規矩準繩之外斯其難
歟以為非靜不足以致養故中年以前多在山房其
近京之地則三角紫霞大慈淨土古靈萬壽及道峰
鷺湖足跡殆遍在驪湖或結社鷗谷或棲息龍門如
湖西之無量羊角鷄龍亦皆其所憩也乃至終日不
食終夜不寢沉息至理恍然而如疑躍然而如喜伊
吾之聲與曉燈不滅常啖稀粥間以菜根其堅苦忍
性古人或所未能為事親恒以不有其身為心既沒

哭泣悲哀人不忍見暮年不御菜醬三年不脫衰絰
夜不就寢倚壁假寐而已朝晝之間號擗墮絕涕淚
所漬枕席無乾時枯瘁骨立雖親舊相見不復可認
終喪之後每遇忌必自月朔不進肉及將事弔慟如
袒括之初顏色慘懔終日不言不笑視兄弟如一身
兄弟之子均於子事諸姊如母饑飽寒煖靡不共之
雖僕隸之賤亦必以孝悌之道利義之辨諄諄教
人或笑其迂而亦不顧也遇暮功之服蔬食居外知
舊之喪則為位而哭親友死加麻三月行之至老不
廢嘗以朋友講討為至樂如閔誠齋以升李養窩世

龜林滄溪泳鄭楸谷齊斗皆以道義相推重語云不
知其人觀其友詎不信哉愛君憂國發於至誠每見
時艱咄咄憂歎至欲陳疏極言而以出位為戒而止
者數矣常曰苟可以安國利民輒有不惜身命之意
此吾性偏近墨處公之為行多類此今所書者其畧
也公諱鐔字大叔芝浦其號也朴氏貫高靈自大將
軍之順以後世有冠冕汙今不絕曾祖諱孝誠文科
善山府事祖諱烜義禁府都事贈吏曹判書考諱長
遠吏曹判書贈領議政謚文孝公妣贈貞敬夫人海
平尹氏司憲府監察元之之女公幼侍文孝公母後

寢而先起文孝公為其弱也不欲其早起每曉起闕
輒戒高聲俾公勿覺而公已衣服而起人問何以能
起不失時曰警於心故也稍長頗教宕喜與儻屬賭
戲文孝公見而切責之公惕然感悟入室涕泣痛自
刻責曰為人子不能體父母之心以貽父母之憂將
何以為人不食者累日自是足不出戶庭隨俗作應
舉文字清健出格嘗一起國子試見屈公以為科場
得失自有命而虛費無用之切請一切斷置專心為
己之學文孝公喜而許之自是遂一意致力於聖人
之書己巳春始仕為內侍教官甲戌除侍講院咨議

宗簿寺主簿工曹佐郎翊衛司衛率皆不就朝廷選
名儒為書筵官將以輔導春宮公預其中又疏辭不
赴召連除翊衛司翊衛堤川縣監公以春坊之除及
直為陞品俱非蔭路常格終始力辭丁丑除司僕主
簿始乃拜命未幾除洪川縣監當飢饉癘疫之餘殫
竭心力一以濟活民命為務不計風寒霧雨朝出夜
歸哀傷惻隱發於顏面民賴以全而家累不免作粥
度朝夕道臣以仁化融洽為考績之目己卯棄歸甲
申拜宗廟令陞廣興守出為榮川郡守榮興李文純
陶山及安文成竹溪相近絃誦俎豆有鄒魯之遺風

公拊摩之餘勸獎儒學大有作興之效值歲儉賙賑一如洪川所濟活甚衆邑子至稱爲今之夫子繡衣以其實歸奏丙戌投狀歸丁亥四月十二日感疾卒于西門舊第春秋五十六初葬陰竹無極村後遷蓋浦羊角山向卯之原配淑人坡平尹氏右議政忠正公趾完女有男女各一人男亮漢魁丙子司馬今爲戶曹正郎女適縣監吳遂郁正郎一男一女縣監二女德壽於道未之有見不能發揮公所造之深只據正郎所爲狀叅以平日所聞見叙次如右系之銘曰世儒卑陋學同有恒公厲其志匪藉師承古聖有訓

拳拳着膺循序勇趨譬拾級登體立用行動蹈準繩
絕嚙啖蘼楚帷映燈如離羣鶴如苦行僧惟靜乃專
至理斯凝孝衰仁缺久矣鮮能公致其身早夜兢兢
三載血泣殆不喪勝暑月苦腐寒天鬚冰蓂莪廢詩
昔人所稱風徹鶴唳蒲書遠徵兩邑施惠弊蘓瘵興
歸來衡茅樂在曲肱講磨麗澤二三其朋胡不少淹
奄化之乘羊角有山紫氣其騰公宅于是千載勿崩
咸陽郡守金公墓誌銘

公諱鏜字聲中安東之金自新羅敬順王以後貴顯
甲東方有諱方慶封上洛開國公勲烈赫然麗史載

其事有諱士廉官左司諫麗公守義不仕没于清州
清州人俎豆之七傳而有諱澍魁中廟朝文科與退
溪河西諸賢同賜暇湖堂官禮曹叅判明廟末以辨
誣使燕卒于館後贈禮曹判書兩館大提學封花山
君生諱正舅早没贈刑曹佐郎生諱熹文科長興府
使生諱恭基文科司憲府掌令配海平尹氏僉知中
樞府事旺之女繼配南陽洪氏司宰監僉正贈議政
府左贊成命顯之女各有一舅公洪出也在幼而孤
既長能自力為學閒遊塲屋每居前列入而事大淑
人無違志出而事伯兄如嚴君焉內舅洪判書處亮

每歎曰使我有子如某復何憂哉乙卯中司馬丁巳
丁大淑人憂服闋連赴舉屢入格而竟不第朴西溪
世堂見公呈文深加歎賞丁卯除健元陵叅奉遣內
資寺奉事司膳寺直長陞內資主簿移義禁府都事
刑曹佐郎陞正郎仁顯王妣復位兼母禮都監郎廳
移司僕判官出爲咸陽郡守政尚寬和吏民交頌乙
亥歲大歉咸爲甚公憇心罷精賑救有方民賴以全
活遍問境內高年饋之以食前此邑社及諸祠神板
棄置官庫糞壤中公曰慢神有大於此者乎悉屋而
藏之於是改建文廟增脩武備蠲免賦役禁止竊盜

邑遂以大治觀察使上其治行節度使又以軍政修
舉褒聞賜表裏以旌異之秩滿適歸壬午除義禁府
都事出為麻田郡守甲申引疾自免歸麻民追思碑
之丙戌除義盈庫主簿遷工曹正郎出為楊根郡守
發吏之盜民結者治其罪而括其贓以補民役易弊
興壞一邑改觀以失上司意坐罷壬辰除翊衛司翊
衛甲午正月二十四日寢疾卒于家春秋七十公元
而能寬嚴而不較平居寡笑與言於物無所嗜好尤
不喜華靡居處服用雖甚樸陋未嘗易而新之澹然
無一毫營為之意惟客至則喜命酒或設饌相對若

因空乏無所具退必不怡人有所求舉而與之無所
惜以故在官時求丐者趾相嚙隨力所及不以為煩
其以事干者雖其施與違各視其宜而其接之也未
嘗不款款以是雖失望歸者亦不敢愠然已有所乏
則未嘗有求於人嘗言吾平生不向人有所求不與
人有所較又曰人雖無才德富貴則自大雖有行能
貧賤則見輕以貧賤交富貴為辱甚矣以是絕不與
要人叅尋在官亦不以官物遺貴近其視趨時附勢
之人不啻若負塗之豕其為治不銜才能務在誠實
守法厨供淡泊不異家食非有疾病雖隆寒盛暑日

必早起正衣冠坐待視事及昏而罷或言其勞苦則
曰食焉而怠其事可乎聞世之為吏者或有虐吏以
悅民曰吏亦民也何必乃爾惟其作奸犯科者不宜
怒耳常重交承之義前倖過失絕口不言吏或有以
為言者輒怒叱之解官之日庫儲比初來時必加豐
而歸家乃無供朝夕炊者其恬潔如此家居閉門閒
然惟以文籍自娛每欲籌室溪山之間以為終老計
而貧不能辦雖時得一官如有所不樂曰使衣食粗
足吾豈為是哉洪叅判愛疇嘗薦公於銓官曰其人
如玉居今之世舍此欲誰用乎蓋公方其盛壯之時

人皆期其遠到其衰也皆惜其連蹇不遇及其終也
則皆稱其賢而無一毫疵議之及若公可謂全德之
人矣淑人完山崔氏婦德克備後公十日而沒合窆
於驪州蛇洞負亥之原有三男二女男長聖沉次聖
沆進士次聖渙叅奉女長適直長李顯良次適叅判
尹鳳朝聖沉娶持平洪萬廸女生一男一女男棟女
適士人洪禹衍聖沆娶沈漢章女生三男男長穉進士
次穉新及第次穉聖渙三娶牧使徐敬祖縣監尹埈
士人李希顏女生三男一女男長穉徐出餘皆李出
幼李顯良有四男長敏中進士次敦中徹中徹中尹

鳳朝有一男心宰進士聖沉命穉訪余窮峽托以公墓銘余既惜聖沉賢而以疾廢又嘗與聖沆有交契義不忍辭畧序公官闕附以公事行之可以警薄俗而為後法者系以銘曰

其人如玉其文則錦才既不售仕又坎壈固公之命亦公之故在官在家德則多有惟其多有是以違俗納銘幽墟用識陵谷

淑人崔氏墓誌銘

淑人完山崔氏麗朝神虎衛上將軍純爵其遠祖也皇考諱起南文科永興府使贈領議政完興府院君

王考諱來吉策靖社勲官工曹判書贈領議政完川
府院君考諱後胤侍講院文學贈都承旨妣海平尹
氏僉正贈左贊成勉之之女淑人生三歲而承旨公
卽世十一歲而尹夫人繼沒為伯兄所育十九而歸
于郡守金公鏜時舅掌令公沒已久獨姑洪淑人在
堂淑人旣入門克敬克孝終日侍側不命退不敢退
婉婉承順猶影之從形咸陽公家故清貧而淑人則
代有勲貴饒於產業然不敢輒以其富厚加於舅家
凡有所得悉以資洪淑人所用筐篋中乃無絲毫私
蓄洪淑人始見淑人姿相端潔動止有禮固已心喜

既久而察其所為乃歎曰吾婦其賢乎世謂早失父
母者失訓而無行吾昔信其語今乃知其謬也亦惟
得於天者有善惡之別耳洪淑人既喪冢婦詔淑人
曰吾沒則於汝乎食洪淑人既沒淑人哀慕踰禮三
年躬執饋奠終始不怠其遇忌亦然平居早起盥櫛
終日手執女工至老不廢常曰婦道雖以柔順為主
然若不濟以剛斷曉於大義則亦不足貴矣故其治
家寬而能肅咸陽公既律已峻潔而淑人亦以清介
合德允咸陽公在官若內若外淑人絕不營私利以
累咸陽公其在秋曹有訟於官者密引女奴獻白金

數十兩淑人叱而却之後聞其貨入於僚郎家又有
里媼私饋瓜果淑人識其意亦却不受咸陽公家居
不以事務經心而內外之事細大必舉者繫淑人是
賴焉每恨祿不逮養或得官物必泫然久之訓子女
以義舅則勉其篤於文行女則戒其善事舅姑而勿
之有欺允有長幼之病雖至瀕危從容將護不改常
度曰視疾者不宜以憂慮亂心心既亂則救護必失
其道為害大矣明谷損窩兩相公淑人之再從兄弟
也每稱淑人有女士之風咸陽公沒既成服淑人自
是日示疾以甲午二月初四日終焉距咸陽公喪塋

十日壽六十八前沒之二日氣息已微甚而神精了
然不爽呼侄昌瑞執筆書遺命定祭式使從簡約分
資產均於子女以至衣食歛殯之事纖悉無遺以其
年四月壬申同前喪啓朔十日辛巳合窆于驪州蛇
洞負亥之原子女及內外諸孫已見于咸陽公墓誌
此不復錄銘曰

奉親以孝教子以義勤以御家莊以治己具是衆美
以相夫子亦既相之又從而死嗚呼淑人不愧女士
習坎姜公墓誌銘

姜公弘仲沒且十年其孤壽平始克具狀謁余銘曰

子於吾先子少時交也重有婚媾之義敢籍是以為
請且誦蘇子之言曰達賢者宜有後此言順天者當
受其福也然世之立言君子類多樂為顯者添其光
耀而不喜闡發幽潛斯不幾於逆天乎惟吾子豈為
是哉言已而泣余曰子之言是也然所謂顯者雖顯
於一時而未過數十年世乃不知有其人或反遺之
臭焉賢者雖窮於其身而必有後世之名天固以是
報之矣君子樂稱述賢者之事所以順乎天也獨子
所以托夫闡發之圖者為求其人耳余敢有愛於不
腆之文乎遂按狀而序次曰公諱濟相弘仲字也其

皇考當仙曹
王考

先晉州人遠祖啓庸官國子博士歷四世曰君寶曰
著重俱顯于麗季著重有子淮伯弼通亭官政堂文
學入我朝為東北面都巡問使有子宗德碩德皆有
名德公宗德後也皇考諱楫不仕王考諱與載有文
學官侍講院輔德考諱碩昌由校理出為鍾城府使
以卒妣平山申氏府使恂之女公少孤失學然天才
甚高兒時嘗得句曰山上有花香滿天野中有水霧
滿地滄海翁許格聞而奇之以為意致宏大弱冠之
歲始自奮為學於書無所不讀讀不過數十遍即終
身不忘茲而為文源深而流長隨地方圓百折不窮

尤長於駢儷詩辭紆餘澹宕絕無累句苑語其為程
文亦精能過人然屢試輒見屈每歎曰世無知我文
者戒其終於窮乎性至孝九歲從府使公於鍾城府
使公有疾公晝夜不去側府使公慮其弱而損也俾
逆居于近廨間舍公泣不肯強而後出府使公遣老
妓數人與之處妓多逞俚語又招隣兒資其嬉戲公
皆禁止之惟憂惧見於色及府使公沒弔泣頓絕居
喪之節不以齒而有所殺申淑人每不忍聞其哭輒
不令與於祭府使公嘗手裁讀書筭與公公敬之不
敢損及公沒而發視猶新也事親非愛之難敬之為

難母之慈異於父之嚴敬之為尤難公之事申淑人
既愛之篤而又敬之至申淑人年既老起居須人公
必親自扶護咳唾之罷亦不令人代執癸巳申淑人
有疾公自外乘舟而歸忽心驚夜不能寐借騎馳還
無何疾革公所指血淋漓以灌其口居憂未殯晝夜
哭不絕聲既殯始進粟糜日數溢不食鹽醬具裋絰
伏苫未嘗起坐視天日及暑而奠不改涼時所著汗
垢虬繁亦不捫爬既奠始日再進餐粥不以稻而以
糗若果夏不搖扇冬不就煖肥革枯悴無復血色杖
而後能起然朝夕哀臨未嘗廢見時物之新者必下

泣冬廬于墓雖大風雪必杖而造于墓攀栢哀號日
以為常終三年不與人語語而不笑笑而不齒稻也
果也蔬菜及醬之有滋味者未嘗一入其口既免喪
携挈居于楊根之大灘饘粥求葛無所給而處之晏
如唯以山水文籍自適而已事諸兄如事父不命坐
不敢坐不命食不敢食戊戌伯氏在楊邁癘而沒公
每以不善救療為己之過居常嗟泣數月之內鬚為
之盡白及己亥夏仲氏持憲公在京又邁癘公馳省
之及沒公慟哭曰兩兄相繼逝矣我何用獨生為既
殯而歸過持憲公子進士壽一墓下馬哭良久復乘

馬行垂頭而泣鞍為之濕夕到陶谷里旅次暴卒六
月二日也得年四十八葬于大灘壬戌之原公長身
疎髯內沉靜而外峻整終日儼然言笑甚罕望之若
不可犯而及與人對酒賦詩風流映發介而能和惟
其好惡太明其心一有所定雖百人曉之終不為動
斯其蔽也乃若志慮之貞亮足以守死善道文章之
華瞻足以貢飾王猷而不喜交遊世無知者刺繡文
不如倚市門誰肯然矣吾其奈何哉壽平又言幼時
嘗竊稗書中數句詩假為已作公知之叱令退出數
日召跪于前閉目不語者良久乃責之曰汝之此心

一長凡欺詐之事何所不為壽平至今惶愧不敢忘也卽此而公之方嚴亦可以見矣公娶韓山李氏縣令敬秀之女不育後娶驪州李氏士人蕃之女生四男壽平壽貞壽鳴壽英所著有習坎散稿若干卷莊于家公嘗自號習坎夫習坎重險也公之一生困厄其兆於是乎然文王之辭曰有孚維心亨是所謂身困而道亨公固生而安之若命矣倘其沒而名之傳也愈久而愈著則其為亨也不亦大乎此吾與壽平之所期也悲夫銘曰

古謂三閭之忠忠而過吾謂弘仲之孝過於孝弘仲

之弟過於弟惟知徇乎情而不思制以禮雖然孝悌
夫豈有過由世多不及之人故謂弘仲過乎制詎以
弘仲之賢而惟情之是蔽然則其死也命而非由於
過於孝過於弟神之不祐善其獎勵文足以華國而
竟闕一弟行足以範俗而乃復于旅拔杜弄聲崇堂
納陞眡兄許公兒齒鮒背胡天之所好惡動與人相
戾也吾銘孔哀尚有徵于來世

贈左贊成行知中樞府事李公墓誌銘

公諱漢珪字來叔姓李氏系出本朝莊獻大王和義
君櫻生驪興君轅驪興生載陽正級載陽生泰山都

正鳳贈泰山君生諱尚志贈戶曹判書娶彥陽金氏
通德郎廷覺女是為公父若母幼而以孝聞稍長愛
學於洪佐郎觀有能文聲辛亥遭母夫人喪壬子繼
居判書公憂前後四年持制無違禮既免喪屢舉竟
不中作詩題壁曰幾度文公渡灞行已知詩句竟無
成宜追定遠投毫志早向麒麟揭姓名遂從武舉登
丙辰第除宣傳官遷訓練主簿以曉解軍務兼帶軍
門將官陞訓練判官出為慶尙左水虞侯既滿為御
營把總兼管理郎廳陞訓練僉正戊辰除寶城郡守
因事適除都摠府經歷陞訓練副正辛亥出為定平

府使道臣以治最聞賜表裏以褒乙亥適歸屢經諸
軍門把摠兼別隊營郎廳除軍器寺僉正戊寅除古
阜郡守設補役廳除公私刷馬價責歛民間者既歸
邑民豎石以寓去思癸未除長淵府使乙酉陞折衝
資除忠州營將丙戌內遷羽林將連除龜城府使金
海府使庚寅沁都有等城之役公以中軍董役未訖
適有海警沿邊邑有擇差之舉以公特除沔川未久
移拜昌城防禦使別抄武士教以兵書而身勸課之
乙未除忠清水使己亥除慶尙右兵使設軍餉窮以
備緩急亢宿弊多所改革士卒稱頌久而不衰肅廟

入耆社以公年七十特陞嘉善庚子又以閩帥父陞
嘉義由禦營別將陞中軍兼都摠府副摠管丁未以
五子登科超授資憲階仍拜知中樞府事戊申迸變
公之長胤汝迪以谷山府事移授長端防禦使領軍
進駐弘濟院旋以嶺賊猖獗拜慶尙右兵使率輦下
親兵南下公手書戒之曰夫為將之道受命之日忘
其家臨陣約束忘其親援桴鼓之忘其身汝其勉之
己酉以年八十陞正憲是年春行重宴宴至八月八
日告終于正寢訃聞輟朝二日賜帛祭賻如儀以長
子勲贈議政府左贊成十月丁亥葬于楊州高嶺德

坡洞午向之原公氣貌端嚴飭身居官皆有可觀尤
篤於行誼貧族之陷於困窮者必推衣食以濟之死
則哀傷而助其歛葬筮仕五十餘年非公故未嘗投
足權門屢典州府而解歸之日家無宿儲每以良田
萬頃日食三升大廈千間夜卧八尺告戒子孫其簡
潔又如此配貞敬夫人安東權氏習齋擘玄孫僉樞
諱之女生三男一女長汝迪兵使娶通德郎李歲女
次汝晦郡守娶府使鄭智女次汝益縣監娶通德郎
趙曼昌女女適通德郎閔澈側室有六男一女汝忠
汝明汝欽汝良汝信汝寬女適洪謹輔禧遠裕遠兵

使出也趙顯遇黃壽寬妻郡守出也初遠並三女幼
縣監出也餘不盡記兵使累然衰服來乞銘不敢終
辭謹就狀序其畧系以銘

曰壽曰貴曰唯多子是謂完福全者鮮矣彼昧火馳
冀以力致希全而缺欲崇反圯公惟不求乃臻乃萃
閔胡其然惟德之厚懿茲厚德固天所佑吾銘甚質
垂則在後

任童子壙記

任童子名桂得死時年十一殤也其父彥甫哀甚每
語及涕簌簌下嗚呼父母之於其子不才而壽及其

死猶不能為心況才而夭如桂得乎始彥甫無子取其同祖兄遇之子子之桂得也纔五歲矣穎悟絕倫始受讀唐人小詩已能作句語有曰大溪流自遠燈高火光圓語皆警絕翌年丙午彥甫讀左史試以教兒兒能通解日課數板著郢鼎二五耦說及荀息論辭理甚美絳縣老甲子之說隱說難曉又能究釋洞然凡姓名官族繆轆錯亂者亦復辨析了了長者有未能記拓問兒指對詳悉一無差誤於是桂得之名籍籍一世而識彥甫者多以名譽太早為戒己酉讀唐詩長篇仍依其韻作十數篇氣勢矯健觀者為驚

讀三國史各有所詠其詠吳曰手把馬箠崛起先筭
齒不過十五年但不畱心天下計空守江東一隅邊
彥甫曰何以知為十五年兒曰孫策時年十七權不
過十五歲耳以先主之得荊州而失吳歡為共計仍
論荊益山川如在目前至於某地之在某國某國之
在某方亦能歷指如身親按行者其才慧如是而至
行又過人出遇飲食輒袖歸以進於祖母玩好之物
雖所甚愛苟諸妹欲之輒解與無所惜在彥甫側朝
夕卷舒寢具惟謹使之祀搔按摩雖久不命止不止
也方其病其母亦病能自力呼婢使進粥飲手磨艾

欲以灸母痛處雖在垂盡之際父母勸以藥必蹶然而起盡晷而止其沒在己酉十二月二十一日其葬在楊州瓦孔里子陞之原彥甫名遜甲午上庠高麗御史大夫澍之後穆陵朝有諱鉅號鳴皋工詩名於世卽其高祖也世之論才而早夭者必曰物潔則易污氣清則易散此在中古而已然況今世下而俗漓兒之慧又特異於人其何能久於世嗚呼其誠然乎其誠然乎彥甫無以寓其哀屬余為文將納其墓記事繁而不殺所以致悼惜之深也

權淑人墓誌銘

淑人權氏系出安東麗朝太師幸之後大父諱鏐承
政院右承旨父諱瑀禮曹叅判妣貞夫人徐氏穆陵
朝駙馬達城尉景霽女淑人自幼天性孝友叅判公
每稱諸子女中鮮有及者及笄歸于成川府使金公
必振公弼楓崖禮曹判書慶川君贈左贊成謚貞孝
公諱南重子也有才有德宜通而蹇尚論近世人物
者靡不嗟惜公既澹泊自居不以世務營心而淑人
能體其意雖并日而食未嘗設困苦之色公嘗自外
邑解歸當嫁女淑人用子母錢買婚鞍公曰胡不於
在郡時言之淑人曰方公務鞅掌何可以家間細事

煩聽公之莅官固清秀而淑人內助之美又如此及公下世後淑人獨尸家政內外井井有法度人不知其為寡婦家慶恩府院君諱孝簡公柱臣楓崖公之從子也早孤父事楓崖公淑人之慈愛孝簡孝簡之盡誠淑人皆均所生孝簡公嘗欲備記閭閻以遺後之人竟未及就今距淑人之沒二十年矣其嘉言懿行無從而徵顧嘗聞孝簡公之言曰淑人寬裕仁厚之德多出古今哲婦之上又曰淑人鑑識甚明惠順王大妃殿下在冲年每異視之曰此兒非常人孝簡公平日簡於言辭雖家庭間未嘗私有所稱述則唯

此數語豈不足以取信乎淑人之卒在庚寅十二月
五日享年七十七男介臣有俊才早塲娶完山李氏
忠勲府都事適之女生子不育以孝簡公第二子九
衍為後官僉正女長適都正趙道輔生三男一女男
尚綱監司尚綱縣監尚紀直長女為尹天紀妻次適
李奎著次適林澥生一男二女男 女為某妻次適
牧使李衡坤生一男四女男錫勉女為金廣淵韓德
一崔某柳某妻次適郡守贈叅判林世諱淑人與吾
先君子為姨從兄弟於德壽從姑母也今於僉正君
之托有不敢辭者謹畧序如此系之銘曰

嗟惟淑人女士之風克配君子安其固窮在漢季世
曰有梁鴻德曜為配并休齊美惟公淑人儼德無愧
推其仁厚宜享厥祉胡祿令嗣胡窮厥生天道迴泐
莫詰冥冥尚有令譽揚于千齡有欲考信請視斯銘

贈淑夫人全州李氏墓誌銘

夫人國姓世宗大王第五子廣平大君璵七世孫諱
厚源策靖社勲封完南府院君卒官右議政贈謚忠
貞是生諱週忠勲府都事贈司憲府執義娶延安李
氏戶曹判書延城君贈領議政諱時昉女寔為夫人
考妣夫人生十六歲歸于贈吏曹叅議金公諱介臣

踰年而金公沒又踰年而幼子死其哀隕摧剥殆非
人理所堪然在父母側輒以愉色自持絕不作憾容
世之婦人多以舅家得失歸語於親戚間而夫人雖
纖毫之微絕不出口母李淑人有宿恙夫人竭誠扶
護十年如一日李淑人每稱其孝推而事姑權淑人
如事李淑人生則盡其奉養及沒自歛至葬一皆身
自經紀不以委諸人一家皆稱其孝家雖貧享先必
誠必潔年雖薦老手執刀俎滌鬯視膳不少懈與金
公諸姊妹友愛篤至李氏婦後夫人入門而生夫人
教養甚勤視其子女如己出有病則憂念至廢寢食

或言兒自有父母何自苦至此夫人曰自幼撫愛鍾情已深雖欲忘又可得乎接人仁厚至於婢僕之賤亦未嘗加以惡口早嬰禍釁孑然窮獨而人不見其有戚嗟憂苦之色處之殆若讀書達理之士於是乎益知夫人之賢為過於人也以今上二年丙午四月五日感微疾告終于家享年七十二以其年五月十一日祔葬于楊州東亭里金公墓左燕向之原至戊申以國舅慶恩府院君孝簡公諱柱臣第二子九衍為後寔遵孝簡公遺命也其封贈用九衍原從功九衍娶某女官司饗餼正銘曰

夫疑婦之誤

孝于父母而推以及於舅姑友于昆弟而推以及於姊妹斯固百行之源鮮或覲於男子至於委命安分而怨尤不設於色辭在賢哲而猶難乃夫人而能之嗚呼夫人之賢宜作閨閣之則埋銘幽墟尚千古而不泐

恭人金氏墓誌銘

恭人慶州金氏父諱杜臣領敦寧府事慶恩府院君贈謚孝簡大父諱一振贈領議政曾大父諱南重禮曹判書慶川君贈左贊成謚貞孝母嘉林府夫人趙氏永平縣令景昌女恭人生而姿容端潔稍長喜觀

小學三綱行實手書而口諷如傳奇諸書世俗婦女
所深喜而恭人獨不肯寓目言語動止不待姆教而
動合規度父母親黨皆竒愛之年十七歸于尹君勉
教事夫子順而異凡其所欲為者無不極意助成遇
有所失又必正色規警尹君屢屈塲屋嘗以為憂恭
人曰士惟勤於自修名在其中矣奚科名之為貴况
今世路艱險此非所急也尹君甚愧服舅郡守公享
有高年恭人供養甚備具饌必精調甘醎陳罍必明
滌整潔郡守公甚安之姑没于溫陽官舍恭人每以
不克自盡於侍疾送終之際為至恨語及必嗚咽待

娣姒和敬備至御婢僕曲有恩意家庭之間人無間
言恭人素清羸又累哭子女積毀成疾至丁未春而
草其夜尹君適假寐傍人欲提告恭人遽曰夫君緣
我病失睡多日慎勿告也府夫人臨問其病恭人喘
喘床簀乃其辭色如常日固請弛慮遽次既遽則淚
流沾席竟以二月三日没于寓舍得年三十七凡舉
六男二女存者三人長東旭娶李啓女次東次三
歲夭死於恭人喪在殯之日恭人於惠順大王大妃
親弟也訃始聞上特教政院俾依明聖大妃母弟權
益興妻例給喪葬諸需又遣中使弔孤護喪自大王

大妃暨王大妃中宮皆厚歸其贈上又命除尹君職
既旬而恭人弟後衍九衍入侍東朝慈聖教曰吾弟
柔順和遜之容如在眼前雖欲忘而不可得又教曰
內賜衣衾多綾緞誠以非此無所用吾情而念其平
日儉約之志必有蹙然不自安者矣以是年四月甲
寅葬于龍仁縣金坂鄉乙丑之原恭人天性溫粹簡
靜無一毫文飾於外者在父母側洞洞敬慎有教無
違有問無諱推而事舅姑亦如在家而事父母平居
不服紋綺不以金銀飾簪珥端慤之微不忍身踐所
畜雞犬不以充庖喜施與盡己之情而不責人報於

人之過失尤絕口不言男子或有言輒揮手止之曰
苟見其非只宜反省汝身要無如此事斯可耳隣有
富人因女奴來請折簡於宮家事成則請以百金爲
謝恭人嚴斥之戒不復徃來又有饋生魚尹君者有
所要恭人亦不受尹君自外還戲曰獨不念食無魚
乎恭人曰非義之物奚可登盤其律已清嚴又如此
孝簡公居家簡重雖子弟有善未嘗稱揚獨於恭人
則曰吾女能不失一點天真尹君之言曰挾貴人情
所易善處舅家婦人所難吾妻生於大家內聯長秋
而持身愈益謙慎父母旣曰是善事我而吾兄弟姊

妹亦無不一辭洽然其天賦之義多於勉強之修入
門之行本於在家之素是豈世俗婦人所能及嗚呼
若恭人之賢其可銘也已郡守公諱扶坡平人銘曰
昔唐權德輿誌其女獨孤氏曰嘻嘻申申有孝有仁
吾取其語以資恭人其銘曰陽光未晝而湛晻植物
方華而枯落有德無年又奚其相若惟旭之孝尚肩
于晦苟遺祉之愈衍庶存沒之兩慰婉古爲文徵于
來世

贈貞敬夫人洪氏墓誌銘

夫人姓洪氏系出安東之豐山在穆陵朝有諱履祥

弭慕堂卒官司憲府大司憲贈領議政生諱翼官禮
曹叅判贈領議政生諱柱國弭訖翁官禮曹叅議娶
德水李氏吏曹判書景曾女是爲夫人考若妣夫人
天性和而婉焉於孝友泛翁公嘗夜讀書倦而思飲
無佐酒物夫人遽以鰕魚進曰藏而待不時需外從
有齒同而失母者衣新衣傷人語夫人彼衣鮮而衣
衣弊得無羨乎夫人笑曰彼衣雖鮮非慈母手中之
線我衣雖弊奚羨彼也外從兒聞之汪然出涕夫人
時年七歲矣內舅正郎公之喪夫人欲設奠諸姊言
饌羞固難辦十二歲兒又安有祭餼之禮夫人謂曾

荷舅氏撫愛情所不可廢遂爲人裁縫受其直竟具
饌以薦十八歸于粹考金公諱濡事舅姑以孝聞大
姑李夫人忠貞公貴之女也有高識亟稱爲賢婦姑
任夫人晚有目疾不善視物夫人能先意奉承細大
不遺任夫人甚安之殆忘其病待妯娌初無物我之
間凡有事必助其所需而身代其勞隨事善諉出於
至誠莫不感戴悅服己未任夫人沒辛未貞穆公沒
癸酉粹孝公繼沒於持禪中旬衾稱至饋奠既靡不
手治整齊而奉先訓子常有法度常曰祭而不敬神
不顧歆而福不降其可忽乎日必晨興冠櫛坐中堂

命灑掃庭內外臧獲執事者受約束惟謹無敢慢衣
糾盤櫛以及厨竈垣墻位置皆秩然有序平居未嘗
有苟且營爲之事而至於慮事發言則周詳委曲動
合義理世之稱閭範者咸歸夫人焉己丑五月二十
五日粹得風痺告終于家壽五十八以其年八月十
一日祔葬于長端松西面粹孝公墓左卽坐之原始
粹孝公有純德至性撫愛二弟判書公及牧使公甚
篤二公事粹孝公亦如嚴父粹孝公旣沒夫人所以
遇二公者一如粹孝公而二公之事夫人亦如事粹
孝公夫人嘗歸寧李夫人兄弟諸侄或以夫人二叔

之善事夫人爲言者夫人喜見於色曰雖孝子之善
事其親未或過於吾二叔諸姪對曰正由姑母之行
素孝家庭故能致是耳夫人慨然曰若美言之若是
吾平日所爲無過人者二叔事自出至誠夫人有二
男一女男長東翼進士佐郎娶郡守李泓女次東弼
文科判書娶林原君杓女女適李性之東翼二男二
女男光世進士正郎娶牧使李宜著女次光啓娶進
士李宜復女女適尹恭東趙載健東弼三男一女男
長光遇叅奉初娶權益寬女後娶李榮女次光遂進
士娶府使李箕恒女次光進娶縣監吳遂郁女女爲

王子延齡君夫人粹孝私謚也後贈領議政用子東
病貴推恩貞穆公諱禹錫官刑曹判書粹孝公之考
也粹孝公二弟判書公諱演牧使公諱浣銘曰
粹孝之行惟孝惟粹夫人作配其德克似推其家修
舅姑是媚推其孝愛爰及妯娌推其友悌化行族里
嗚呼夫人惟德之備百世在後吾銘不愧

議政府領議政徐公墓誌銘

徐爲達城顯姓即將閑仕麗朝始著譜冠冕相承凡
十三傳而有諱涓官判中樞府事贈領議政謚忠肅
號藥峯生諱景甬尚穆陵長翁主封達城尉生諱貞

復南原府使贈左贊成生諱文尚兵曹叅議贈領議
政娶延安李氏吏曹判書謚文靖明漢女是爲公考
若妣公諱宗恭字魯望號晚靜堂生八朔已能行爲
兒嬉頻踰繩尺稍長遽自收歛惓惓如也嗜學攻古
文辭旁治舉子業華聞日彰癸丑赴會試旣占魁矣
文有違式主試者并拔初場已中卷曰是豈可屈置
人下至乙卯果魁生員并中進士用薦除光陵叅奉
不就庚申擢別試文科分隸承文院爲權知副正字
差實錄廳卽薦授藝文館檢閱屢辭始就轉待教選
南床除弘文館正字賜暇湖堂固辭終不應製歷奉

教及著作博士戚臣金益勲嘗起誣獄竄未久而宥
公既以是爲言而仍論大臣不能匡救之失歷脩撰
副校理移司諫院獻納以親病陳情乞免且言臺閣
多不實選請飭政曹勿以科目爲拘精擇公清勁正
之士上優荅且教曰爾之情理予用惻然當令該曹
授以一縣以伸至情異數也正言朴泰維以允齋宋
公請追上太祖尊號爲非宜將䟽論而中止衆譁欲
論擊議不克合金右相錫胄筵白一日而逐諫官一
人講官二人公䟽請遽寢上不納韓聖輔等爲師陳
䟽語侵公公引避上特命適公職爲校理獻納移吏

曹佐郎達牌罷叙拜司憲府持平屢除銓郎終不就
尋移修撰疏論外戚金錫翼中批陞職及妖巫減死
之失韓公泰東以執義疏列金益勲罪狀并斥相臣
上怒命削黜公劄爭言泰東所言勁屬可尚驟加威
怒竊恐損聖德沮言路上嚴批不納除此評事重臣
言公有病親特許遯出爲金化縣監未赴內移玉堂
尋除金城縣令翌年復以玉堂台還取朱子劄貼黃
陳戎大意在廣聰明不押近習陞應教移執義遯拜
校理疏論時弊九條且請甄用言事諫官朴泰輔等
漫批嘉納又書進太祖朝王子諸君本科外不加賜

田結故事附論官庄之弊曰山澤魚鹽之利國之所
資今乃大半不籍於公家無補軍國之需無資生民
之業天下豈有是理又書進大易節之永傳反復申
論節財之方移司諫應教時清人有罰金之舉將遣
使陳辨而使命屬於宗班公疏請以大臣充价曰遽
禁不嚴變釁遽生畢竟辱罰專歸上躬而舉朝官位
安保如舊又其奉使之役未聞有奮身而先應者草
澤忠義之士必有扼腕不平於斯者德壽先考叅判
府君在玉堂因地震之變疏論外戚及女謁上震怒
始命招詰事狀終乃削黜公率諸僚求對力爭上愈

怒聲色俱厲亟命退公進曰與其得罪於後世公議
寧被重譴於今日陛拜承政院同副承旨適為刑曹
叅議復移承旨繳還淑儀金氏進秩之命適拜兵曹
叅知為養出為利川府使明年入為大司諫承旨玄
石朴公以吏判進袖劄論宗戚杭事上移怒命宗親
府摘發媚嫉杭者南領相九萬呂右相聖濟求對語
多觸忤上震怒并竄兩大臣而適朴公職公啓請收
還承嚴批胥命金吾門外疏入卽適出補鐵原府使
未幾病免己巳仁顯王妣廢處私第公與散地諸臣
疏爭不能得仍屏居郊外時宰忌之除晉州牧使辭

不赴甲戌上始悔悟一變前日所爲公卽拜禮曹叅
議兼承文院副提調移大司諫右副承旨遷拜吏曹
叅議因事辭遷再爲成均館大司成罷叙拜副提學
移吏曹叅議乙亥用薦陞拜漢城府右尹兼同知經
筵事移戶曹叅判兼同知義禁府成均館事復遷大
司成每當課試輒發名下士尤殫心於勸課之政無
籌司槐院內資提調移禮曹叅判除開城府留守值
歲飢賙賑以誠民免流亡又移大司成轉大司憲副
提學兼觀象監提調因畫講言人氣和則時氣和近
日朝象乖和宜思寅畏導率又曰宮中用度務從節

損而王世子嘉禮時尤加省約此不但有光儉德其
在養福之道亦甚有益上并開納書進嬪宮竹冊文
承賜馬命兼右副賓客移使曹叅判兼弘文館提學
適爲判浚事兼宗廟署提調入侍言今春都民糶穀
旣令退捧又令減半又許代錢甚大惠也然都民困
急二斗米折百錢猶難辦請改許以三斗移大司憲
副提學因虹變上劄論君德極言務實之功歸其要
於治心端本又請停罷宮庄寢三南簽丁自內間用
度至諸司支用隨事節縮盡歸賑資外邑守宰勿拘
年限擇差廉謹之人而向來情犯稍輕有才望者廣

加甄叙以恢用人之方上賜優批施行原劄命留中
適拜戶曹叅判復遷副提學引真德秀所論窮格之
工反復陳說上稱善仍教曰世子方日開書筵文義
之外宜以閭閻民事物情隨事開陳使耳聞熟習
公方常賓僚故上言及此移吏禮工三曹叅判兼藝
文館提學多辭不就俄進兼守西館大提學知成均
館事校書館提調仍拜大司憲辭適除兵戶曹叅判
戊寅冬又用薦陞拜議政府右叅贊差莊陵都監堂
上無知義禁府都總管繕工監提調移禮曹判書已
卯丁李夫人憂制除拜右叅贊兼尾署提調藝文館

提學又除戶曹判書再辭得違除禮曹判書仁顯王
后昇遐差殯殿國葬兩都監提調辭違拜判尹不赴
召命爲憲臣論罷叙拜左叅贊以嫌違無冰庫提調
差北路試官屢辭不得命赴吉州試取文武士在途
拜大司憲時兩司請竄南公九萬柳公尚遵罷尹公
趾完職以貸希載死釀成宮闈之變爲衆公既還朝
引避直其誣時論大咈諫院遂請罷叙拜知中樞工
曹判書兼濟用監提調差冬至正使屢辭不許自燕
還復拜判尹移吏曹判書兼知經筵力辭得違除工
曹判書兼右賓客知春秋差撰輯廳堂上改修端宗

實錄以董大報壇役進階正憲遷刑曹判書復移吏
曹干托不行躁競為息陞兼判義禁府事累疏得遞
乙酉冬特旨進拜議政府右議政公頌而微偃義鬚
髯方穎秀耳眼光燁燁射人而恒斂睛低視對人言
溫溫恭謹惟恐或傷其意至其有所守毅然有不可
犯之色出入筵席氣壯而足矍進退雍容甚可觀廷
中目屬而上亦深知公小心謙畏意其可大用至是
李領相濡膺命歷卜數人皆不當上意上不悅而罷
未幾遂有是命公累疏乞免上連遣史官承旨使之
偕來公固辭凡十一疏上復賜手札曰卿清操謙德

博識雅量夙負公輔之望今茲特命非予一人私意
復遣承旨敦勉公不得已出而承命上面諭曰卿不
我遐棄國事誠幸矣公進曰當此時勢實無一事施
措之強然苟能自上憂勤警省少無間斷則國事庶
可做矣仍陳節損之道請自宮掖始公自是年至甲
午前後十年之間再爲右議政三爲左議政三爲領
議政間又兼扈衛大將司譯院御營廳內醫院都提
調臺臣論李東彥遭父喪使官奴脅舍且致罪上命
鞫東彥正刑公劄論曰國家用法如秤不當有毫髮
過差假使薄親喪不孝之惡有浮於脅舍何以加其

法乎惟當付之有司照法論處不宜徑下勘斷之命
朝臣以上卽位三十年稱慶請進宴公上劄陳戒仍
請諸道糴穀積逋難捧者限數年蕩減始有林溥者
陳疏論辛巳治獄之失意在嫁禍而搢紳間因此互
相袒搆公與崔公錫鼎平心按治竄溥海島至是又
有李潛授疏其言益危怵上震怒親鞫潛而特拜李
頤命爲右相更按溥獄溥杖斃執義李德英曾爲問
事卽至是見上意稍變乃疏詆獄事公先已呈告違
職授西樞遂晉命金吾外仍出任江外明年五月上
諭召在外諸大臣公五疏辭不許始赴命曰賜對陳

水災之慘請加意恤民之政務軫節省之道承命薦
大提學校理申鐔謂所薦非其人疏斥公公陳疏引
咎又因司諫尹世綏疏連上十九劄又遞授西樞上
嘗粹下嚴教削黜內局三提諫公疏救曰臣子而緩
視君父之疾此豈近於人情天理顧平心徐察以得
其情上悟命收還與諸大臣入對公啓言民間疾苦
身布最重請限年蕩減其逋負兩南被災邑亦量減
其大同米從之清人移咨云海賊猖獗宜加警備國
內繹騷上亦憂之公奏曰所謂海賊不過海島間出
沒之寇下陸則易制豈有滲入內地之患惟當安靜

以鎮之仍請令各軍門加造兵械分遣巡撫使於西
南巡審閱防又劄論宮差撓民宮屯貽弊狀請嚴法
重究多數革罷又言王子諸嬪第宅過盛國典所載
俱有定制從今以往深以侈汰爲戒上自宮庭之間
常存節約以爲躬率則自然惠澤及民而聖德彌光
上嘉納仍命太僕屯田丙寅以後移屬官家者并遷
給本寺渭原民越境殺清人至有會查鳳城之舉胡
差目欲窺覘北路山川事端層變部聞劾午公指揮
動合機宜而橫議沮撓朝令靡定卒乃如公所料上
深念隣族之弊特令廟堂講究公言戶布丁錢事勢

難行請查各道不緊名色汰補闕額以紓一分之急
遂與諸宰商定節目奏行之引病又適授西樞時經
庭試科副提學李健命疑考官李塾有行私跡疏發
之於是獄事大張持平李世德曰論事遠竄公疏言
金吾刑曹推讞之際舉措意響緩急有偏衆言喧然
不平臺疏之所以發遽施重典非盛世所宜有黨健
命者遂迭出侵斥公呈告又適授西樞癸巳李領相
濡以上卽位四十年請稱慶陳賀已又請上尊號公
上劄曰在今時勢艱棘決不當有豫大之舉聖志謙抑
固宜將順且觀司馬光以勿受尊號勸導其君忠愛

薦至可爲師則臣旣以是存之於心省顧初見不敢
變改上怒政院多捧䟽章并責藥院公䟽遶提調卽
出江外上連遣史官承旨勉諭公辭愈力又遶授西
樞陳情乞解無帶上特宣別諭僅示悔意公旣入城
而復授以內局之任有申球者投䟽構訐美村尹公
左相金昌集劄請毀其遺集板仍勿捧仲救䟽公遂
劄斥其失以爲球之不罪而又禁人之有言此豈聖
世舉措上拒不納公卽出舍江外丁酉七月上獨召
左相李頤命賜對有非常教羣情恟懼翌日公抗䟽
陳戒有中夜涕泣之語公前後所言於上者不可盡

記記其大者而已端懿嬪喪公受都監都提調之命
訖事而退已亥上援太祖朝故事入耆社公入叅賀
班將還寓梓感疾危重王世子遣御醫看病賜肉劑
又命掖隸致饌物至二月二十一日甲子告終于第
享年六十八訃聞輟朝三日王世子下教嗟悼命給
棺材給俸三年而殿并致吊祭有司具儀物以四月
十七日葬于長湍治西都羅山負丑之原從先兆也
聞公喪自措紳大夫暨市巷小民莫不咨嗟曰賢相
亡矣啓劄之夕都下坊民通文五部相率而送於野
以千數返虞日亦然古未嘗有也公幼雋爽未弱冠

沉患默悟頓變舊習莊重而寬和謙恭而整肅世言
氣質之難於變化驗之公殆不然也雖未嘗片片以
問學自居而其天資近道詩體飭躬而尤用力於持
敬謹獨故宅心靜謐而其發見於威儀動作之節者
亦棣棣而不可遁非世之標學名而少實踐者所能
幾也孝友根性在庭翼翼無違行及奉諱哀毀踰禮
幾至滅性事大夫人務順適其意病則晝夜扶持對
藥視饌亦身親任之不以官高而輒委人值忌茹蔬
屢日哭泣感咽若袒括之初日必晨起盥洗謁廟非
甚病未嘗廢出而立朝言論風旨先主乎名節而必

以忠信勿欺自勉當黨議橫潰之日沫惡觴激不肯
苟循時趣秉心堅貞超然色目之外人亦不敢目公
以偏私也家居惟以書籍自娛時或蒔花栽竹以寫
晚趣閨井象胥之徒屏跡於門庭之間而甚至朝士
之營私規利者亦復不踵公門門外之迹如掃過者
不知爲相公家居處蕭然如寒士甌居屢空而口不
問生產人有饋餉雖其有名者少或過制輒却之苟
非供職之日乃至常廩與騶直亦屢歲不受其謹潔
又如此文章道潔縝婉自成一家如經義科體一洗
程曰有獨得神解之妙操觚家競相傳誦所著詩文

各體四十餘卷藏于家公既素性恬冲不樂文處權
要雖目上眷隆重貺勉遲回而未嘗一日忘休退晚
欲因范蜀公事告老以上疾積年彌留竟亦不能成
其志其可悲也夫人全州李氏僉樞贈副提學憲女
孝事舅姑舅姑稱其賢飭身以儉理家有法溫粹靚
穆絕無浮華外飾門黨化其德而措紳家咸以閨則
之懿歸之公卒未數月以毀繼沒葬祔公墓凡舉五
男四女男長命倫有文行早切次命均文科判書次
命純進士直長次命彬文科大司諫女長適李秉常
文科判書次適鄭錫慶生負餘幼而夭命倫娶縣令

洪澤普女有子而殤一女適趙尚行文科正言命均
娶右議政金構女生二男三女男志修忠修女適進
士李命集趙鵠命宋宅仁命純娶監司李德成女生
三男一女男日修晦修餘幼命彬娶判書宋相琦女
生二男二女幼女適李昌壽次幼李秉常一子養
重鄭錫慶三子長元淳餘幼公於吾先君子爲內從
姪齒相近也自少至老情好甚篤而德壽以蘋蘩稚
弟夙荷公撫愛今公墓木就拱而余亦老矣於公身
後事曾無毫髮自效者撫念今昔每用咨嗟判書兄
弟以公墓銘見托夫公之事行太史紀之國人誦之

不腴之文又惡能爲有無只記公歷官始卒而系之以銘曰

達城之徐世有聞人矯矯蔡峰爲國蓋臣侍郎趾美有蘊不伸累世積慶發于公身公在家庭惟孝于親出而仕朝儼其冠紳進退雍容瑞鳳祥麟藝苑提衡天曹程資既長王府遂踐台司聖主曰吁惟予卿知謙德清操博識雅度卿惟兼有卿宜予輔公拜稽首是在聖主惟能憂勤治乃有叙惟能節損民乃其紓聖君曰俞昌言師汝孰爲諍口屢進屢售加額之民泣涕交訴公在于朝庶務收湊筵告讀陳思焦眉蹙

歸視其家盡無餘粟庭梅吐夢階篁抽綠廊廟公憂
江湖公樂雖則公樂憂在其中公名在世公返太空
觀今之士突梯是工其孰如公自守挺然閱世既久
愈覺公賢湍山蜿蜿湍水清連公之遺風百世其長
惟是降魄茲焉收藏告厥後人罔或毀傷

